

四庫全書

集部

欽定四庫全書

南陽集卷四

宋 韓維 撰

古詩

同鄰幾避暑景德

脩廊環無端華殿烏斯草石鯨窺廣庭金像飛半壁高
槐十丈餘涼葉散簷隙茲游得我所烈日徒自赤體煩
愜清潭髮散謝危幘彷徨或持書靜默方對奕惟時驕

陽甚燥氣裂金石城郭困風塽田疇有憂色顧慙無用
軀獨此享嘉適舉頭望赤霄安得片雲黑滂沱為飛霖
一洗周八極

監宿呈一二交游

墻根蟋蟀鳴不休夜宿學省高梧秋昏燈釘壁照孤坐
悲風攪腸生百憂久從塵事非我意直有爛醉為身謀
誰能擺落世俗累願敝肥馬同輕裘

監宿書懷寄崔九象之

偶隨世緣出歲晏未得還譬如無心雲會自歸故山所
嗟平生友日夕阻追攀想子獨宿夜燈明深竹間

官舍書事

官曹本自冷况值秋風後落葉頻委堦斜光半穿牖幽
閒夙所尚默靜頗能久門外聲利喧於吾竟何有

答原甫試墨見貽

金壺道人九法墨持買都城人莫識君先得之寫大句
光與日彩相吞蝕句精墨妙氣怒豪意欲斬鯨連巨鼇

鯨鼇天地兩微物何足辱吾鉤與刀丈夫卷舒固有道
願君少安無草草都城不獨墨好酒亦好安得不飲自
枯槁

和原甫省中種菊

種菊待佳節節至花自繁朝感涼風吹夕愛清露團封
培才幾日翠類紛珊珊君曹本稱劇占署無停翰才優
顧多暇曾不廢覽觀作詩見高興讀之起予嘆念昔田
里居幽事頗復論種此黃紫雜捺亂發墻根擷英泛濁

酒親友日為懽一朝走京邑連歲遭阻艱鬢毛將看白
淚皆熒莫乾時物豈不佳感傷自有端

監宿同鄰幾賦

浮雲吐寒月餘霰清夜氣蕭條廣文直冷冽久不寐所
欣同心友談笑亦來堅高步南樓陰清風散餘醉仰看
星斗移俯念歲時逝茲曹寡吏責疎拙得所庇幸君數
來臨共作苦吟計

和聖俞喜雪

窮冬不雪天子憂既禱乃降惟神休人間半夜天地白
靈澤一灑萬彙周乃知天人相響影自古王者重修省
登賢黜邪朝序清鋤姦戮妖海波靜羣公不勞歲奔走
四時不干雨暘正

和聖俞飲廷老家晚又飲原甫家

人生天地間常為外物驅自非無心者不能忘所趨所
趨既若一莫如飲酒娛飲酒既復醉萬事皆分銖醉心
兀無思安問賢與愚醉目浩無覩安識嬖與嫻是非兩

弃絕幸免禍患俱況吾二三友襟抱達者徒所營既同
方所處又比閭惟吾廷老生宛在城北隅北隅雖云遠
跨馬亦須更季冬陰氣凝風力利石砮從今雪花落徑
往不待呼

奉同冲卿元日雪霽朝會稱觴

漢家萬國朝元正帝呵風師灑其廷雨寒成花皆六出
一洗天地塵埃清高風半天捲雲去空色紺碧惟華星
金烏東來照宮殿瑞氣著物皆光榮繡衣虎士扶脩旗

皂旄絳幅紛葳蕤洞開重門納冠劍肅肅環佩來東西
樂懸未作舞在綴雉扇稍映宮簾垂黃鐘獨奏君德威
赫然天日當彤墀羣臣拜舞千萬壽四方來王敢不祇
愚聞聖人制禮意上崇一尊臨衆卑等威殊絕防僭慢
非止矜麗誇雄為仰瞻儀物固自肅又况烜赫鋪德威
小臣不及觀放仗趨出恍惚猶驚疑朝廷大體安敢識
贊詠盛節形諸詩

奉同原甫度支廳辟許道寧畫松

依韻

長松盤青冥鬱與窓戶對許翁寫生意獨得毫墨外年
侵日昏剥拂拭自君輩得非神物守以待真賞會翛然
簿書暇恍若巖壑內舉手捫紫烟側耳聽清籟蒼林與
老石野性舊所愛一從官都邑茲遊頗乖背慰此寤寐
懷典刑亦足賴幸當掃塵壁促駕我其邁

又和原甫省壁畫蟬

依韻錢
諫議筆

天工不為神衆物自我具錢侯掃墨肇教跪生指顧如
依石穴出尚想秋江度真偽本相奪安知彼非誤

和聖俞遊梁王吹臺有感

高臺壓萬井，四絕埃與氛。上有金僊廬，凌虛結楣簷。嘗
聞登其巔，直視太行雲。壯觀良跂予，夙駕慙後君。況當
朱炎月，烈風來朝曛。泛濫白正醴，飄飄輕練裙。想像簫
鼓處，寥寥如有聞。一寫沈鬱憂，懷古何足云。

和聖俞逢羊

雉以媒就獲，鹿以由見羈。物情非本然，實自巧者為。惟
人莫或使，勢利中奪移。朝游固金石，暮變險穽機。世路

有如此君無獨羊悲

和原甫盆池種蒲蓮畜小魚

依韻

江湖豈非壯浩蕩不可尋
安知一斛水坐得萬里心
植蒲翠節聳種蓮紫實沉
羣魚不盈寸泳淺安其深
主人樂幽事清興生中林
獨觀物性得鵬海均牛溲

監中直舍種竹同冲卿
鄰幾探韻賦得風字

職事情不理種竹養疎慵
愛此炎曠辰獨抱霜雪容
清陰動脩架秀色如本叢
日落衆客散蕭蕭庭戶風

和原甫曉雨

喜雨濯炎夜餘飛入晨光起來坐軒戶北風吹我裳碧
折萱葉亂翠添林笋長翩翩庭中鷺羣飛戲清涼直恐
煩暑盡從此零秋霜欣然跨馬出一醉故人觴

是日赴
景仁會

和鄰幾館宿觀伯鎮題壁有作

依韻

城南飲騎散君赴蓬山廬禁門肅清夜飛閣何渠渠深
沉漏下始蕭颯雨氣餘俯仰河漢明高情邈冲虛獨懷
同舍郎被命分左魚得州東南勝遠郭生笑渠苦嗟已

留滯三歲紛塵裾人生固不一理亦相乘除或彼有所
近或此亦以疎馮唐匿郎署白首常晏如方朔雖金門
避世等樵漁古來守道者期不忘厥初但願飲酒間時
讀古人書

和王昭君

原甫唱
依韻

漢宮姝麗地華觀連珍臺蛾眉三千人皆自良家來昭
君乃獨出負色羞自媒一為丹青誤白雪成緇埃結歡
萬里外不得少徘徊車馬悵不前觀者為悲摧空令琵琶

琴曲千載傳餘哀物生美惡混天意未易回蘭茝苟不
珍且願生蒿萊

和聖俞聞景純吹笛妓病愈

刁侯好事間當年至今風韻獨依然歸來不作留滯歎
能出窈窕夸樽前前時賓客會清夜橫笛裂玉吹孤園
新聲妙逐柔指變餘響歛與高雲連悲風蕭瑟四座聳
清笑自足遺拘攣近聞有疾勿藥喜主人欲飲期數賢
氣羸曲節宜少緩體軟舞態當益妍人生行樂不可後幸

及華月秋娟娟

同楊方叔遊開寶上方有懷里中二三故人

京都寡臨觀茲地高且明仲冬一來望曠然寫予情千
載豪傑盡夷門荆棘生時平盛民物華屋連飛甍長烟
冒百里下視色正青慨彼塵土間擾擾何多營往車無
徐驅來馬無停征顧慙託閒官幸得游衍并念我同里
人三四不在行孔公老龍山孫子令江城崔閒益有粟
辛困冠無纓一回西南首慘淡意莫平

和原甫去年對雪思梅今年對梅思雪

中州寒燠與南異常恨梅花開不早今年朔雪冬不飛
臘月繁英似南好君憐芳物感時節愁見高風凍雪掃
苦嗟十九不稱意徒自令人顏色老雪遲梅早非我力
會使金樽日傾倒

奉同原甫槐陰行

天門觀闕雙凌霞下有馳道開平沙高槐左右覆朱戟
綠陰翠氣相蒙遮朝回旦雲下寶騎游散掣電奔香車

我慙太學官況冷旦暮出此驅疲駟清風吹冷南就局
炎日轉景東還家昏然百事不知省空復春葉零秋華

伏日同當事諸君飲延祥觀

適郊憚勤遠近市厭喧跼紛然異趨嚮日晏靡寧足回
車憩琳館邂逅得所欲涼飈颯生林飛雨時度竹醪醪
挹雲漿佳菓咀冰玉謹爭校奕碁談笑追割肉茲辰著
休令嬉燕動輦轂聊從一時樂庶以同厥俗

之祀奉呈同行二進士

煌煌儒者宮是惟風教首羣賢日造集經訓謹傳授公
田有常廩著令所從久逋租積歲月課督豈宜後浮舟
出東郊秋日麗榆柳幸同二三子談笑失炎晝鄙生竊
薄祿萬補無一有佇觀盛化流朝列登秀茂彼微主薄
官豈敢息奔走

圍城視圍

下馬步榛薈弔古高陽門鳴蜩亂深樾蔓草被頽垣席
陰得佳木解帶休我煩二年官儒館始嘆吏役喧學圃

蹈孔戒征利服軻言黽勉職事間大懼失所存秋風熟
梨棗令人思故園

和冲卿晚秋過金明池

聞君西郊行正值秋風晚清霜卷枯荷碧玉瑩池面浮
空結脩梁涌波抗華殿雲烟渺淨色覽望一蕭散緬思
暮春際都人盛嬉燕連帷錯繡綺方車騫金鈿填填鼓
鐘響耳目厭譁聒乃令塵囂辭而有清曠戀達人冥至
理喧寂無異觀偶然乘化徃何適非汗漫吾知禦寇游

所樂在觀變

送北都留臺王國博

鑿川當鑿源植木當植根修身有本末請自心術言中
正檢敔側明誠破疑昏性通學且博事業乃可論問胡
能致然聖有六經存子誠好古士拔足立貴門願分留
臺務力學甘避喧吾知大其業流遠實亦繁歸來騁夷
路良馬駕輕軒贈言君勿嗤茲道古所敦

奉答聖俞寄鴨脚實見貽

南國有佳樹結陰君子堂秋風彫碧葉素實登新嘗
懷朋游重千里走絳囊朋游方會合論文開酒場共嘉
明物珍含甘詠雕章章罷默不樂為君一停觴

和永叔小飲懷同州江十學士

翰林文章伯好古名一世家無金壁儲所寶書與器北
堂冬日明有朋聯騎至新樽布几案二鼎屹先置大鼎
葛所銘小鼎澤而粹坐恐至神物光怪發非次羣賢刻
金石墨本來四裔紛穰罷卷軸指撝辨分隸其中石贊

藏家法非一二精莊與飄逸兩自有餘意興來輒長歌
歡至遂沉醉顏饑足簞瓢韓飲尚文字乃知內可樂不
必鐘鼓貴溫溫江馮翊茲理人所詣賦詩多雅言嗜酒
見淳氣歲晏不在席使我長歎喟

和永叔言懷

弱歲抱衰病掩關卧園廬端居寡人事永日惟對書得
花輒手植生草每自鋤最憐脩竹姿擢幹青玉如添栽
歲歲廣翠色滿窓疎起坐一堂內樂此不願餘偶來從

吏役幽事日以疎出門何所見擾擾塵中車素懷就湮
沒有恨不可攄尚念祿仕微欲返復躊躇高賢侍天陛
文章冠嚴徐迹雖臺省遊志慕江湖漁鳳皇覽輝下阿
閣正其居顧惟蒿艾翮分甘侶田鴛因詩益自警庶不
忘厥初

和勝之彈琴

寥寥太虛內漠然函至音淳源一以泄其流播為琴衆
人玩其器賢者識其心勝之明達士於此趣已深發為

新詩謠如聽松風吟鍾牙久不作誰辨雅與淫昭氏貴
弗鼓茲言良所欽

奉同原甫賦澄心堂紙

江南國土未破前澄心名紙世已傳高堂久傾不復見
誰謂此物猶依然當時萬杵搗雲葉鋪出几案滑且堅
剡溪藤骨不足數蜀江玉屑誰復憐君臣嬉燕盛文采
駢章麗曲鬪巧儼一朝零落隨散地中原篋笥生光鮮
君安得此尚百幅題以大句先羣賢羣賢落筆富精麗

瓊琚寶玦相鉤聯嗟予材力豈當敵雖欲強賦何能妍
耽獨玩物古所戒崇尚浮藻政豈先江南可哀紙可惜
後有觀者存吾篇

又和北軒竹上甘露

君家竹上露點綴如明璫垂枝乍驚重暎日復能光聊
可助清興安知為羨祥應從草制暇延詠對華觴

同勝之明叔遊東郊

仲冬景氣佳曠然思遠涉晨遵大堤去寒日在馬鬣浮

屠紅塵外樓殿煥層疊地遐幽景閒瑤碧秀林葉清香
時出箔餘經尚委笈躋閣眺遠陂浮陽來暕暕花枝亦
已柔行見春露浥久耽田野樂況與賢俊接逍遙永日
暇塵事不過曉昔人重時晷所志樹勲業慨予胡不然
空陋無所挾詩情朝生腸酒氣暮醺頰陶陶大化內得
此自為愜諸君能我從遊履方屢躡

奉答詹叔過澶之舊州有作

荒城歸遺堵曙色起桑柘肅肅胡鴈羣風急不得下子

行感興廢弔望一停駕緘詩寄故人明燈讀寒夜

騏驎池上與冲卿同賦

七月五日

清簾翳華屋脩樹環廣池涼風欣然來忽若與我期感
激氣節異念言此何時雲霄有靈匹嘉會方在茲瓜華
動都邑舉俗共遨嬉嗟我獨不飲奈此天運為

答貢甫酌騏驎池上見詒

金行戰陽暑未北炎鬱填胸汗流液空堂大祖不可度
欲取清風自湔滌耽耽華廡列官守對起二亭嚴案席

天渠分水濯龍驥下注方池氣清激叢篁冠島鷺飛映
涼樹搖波蟬不息脫然冠帶一去體始信天時有人力
况吾所與二三友日坐清閒哦簡策篇章爛若揚組繡
歌頌鏗如出金石嘉賓亦有邂逅至間以謳歌侑棊奕
我時聊設薄主人杯案隨時具肴核鼈小惟憂堵父怒
樽空屢動崔侯色歡來始覺非外假鐘鼎瓢簞各其適
念昔與君伯仲遊江翁梅老常接迹得酒有時竟狂醉
賦詩往往連日夕幾年契濶遠朋好今日蕭條無吏役

青衫不踏廣文戶白羽罷走將軍檄
即看秋風破炎毒
高興倏然動肝鬲諸君無事能我從
當使風流似平昔

次韻和平甫同介甫當世過飲見招

炎風得秋亦已涼喜抱塵策羅南窓
策中古人不可見
獨咏君子子心降高文大論日傾吐
響快有類鐘應撞
却嗟吾儕多暇日俚謠一作淫暴謔
何其囋驅車正得我

所念起具有藪陳杯缸自憐愚顛接
豪邁蔽履乃與華
冕雙聖經王道有本末斟挹醇粹揮
其尤須臾上下今

與古武庫搜搜千矛鏃疑懷滯義一開豁有如暗室來
明缸馮侯抗議亦殊健短鉤長鈺相撐擬介卿後至語
閒暇偃載戈甲韜旌幢弱弓枉矢尚何用久已束手甘
避逢是時君有山陽役扁舟已具河之石朝吟淮山翠
撲撲夜夢楚水鳴淙淙軒然欲去坐所惜文字雅正姿
信慳行年三十不得飽況有薦道登朝邦遂令奔放不
自斂欲旅漁釣終湖江朝廷攬賢無遠近北盡漠塞南
嶺瀧如君才大齒且壯安可推亮而居龐

來詩云孔明
勿問襄陽龐

功名得時看樹立豈若都尉眉空厖

奉答原甫登契丹嶺見寄

原甫假翰林學士以行

中原昔失御幽冀不復華我朝示仁撫金幣歲屢加君
恩謹宣道使才慎推差翰林承命行驅駕絕漠沙晨登
寒山嶺回望萬里家勁風搜貂裘嚴冰斷馬撾鄉心感
歸鴈塞淚零悲笳慷慨屬國節迢遞博望槎幸古有此
賢庶足開顰嗟晴陽展歸旗喜氣日以嘉入門解征衫
金樽灑流霞哀絃間清唱嬌鬟蔚如鵷一慰行役勞期

金川先生集
卷四
君柳初芽

和吳九王二十八雪詩

方冬氣潛溫得晚陰始重狂隨風力翻怒若雲面涌中
微玉霏屑後盛毛紛翫寒光動城闕甘滋入田塍鵬騫
海水飛驥憤鹽車更縈樓巧作層覆道高城甬羣方破
昏霧萬物被光寵塗歌涵太和送賀仰高拱判官坐丞
華賦詩掩垂隴貂裘擁宵談金盃落晨捧此興吾不薄
君門旦當踵

答曼叔客居見詒兼簡里中諸君

少乏經世才引分甘自置不意田野姿尚為軒冕寄三
年太學館飽食無所議京都多賢豪出入許陪廁時從
騎省吟或就步兵醉低回衆人內自謂處身智耿耿秘
書府實待才俊地乃昏落其間衆口沸嘲詈茫如觸駭
機狂顧不知避忽逢故人來一道平生志歸心西南飛
勁疾霜後鷺遠慙龍陽隱寧極處士近愧徐光吏象之官不去里徐光
所居詩以謝諸君顛冥非吾事

和彥猷在華亭賦十題依韻

顧林亭

昔人久塵土問林得其居但傳故老言安知密與疎平
湖無遺宇寒烟生廢墟風流未都盡猶賴著書餘

寒穴

寒泉發何年四序常自平上凜冰雪氣中密瑤玉聲豈
無蛇蠃潛但見沙水清妄飲亦可戒山木令人醒

吳王獵場

吳王昔用武所樂惟干戈安知聖人意祝網解其羅朝
行數田獲暮返論戰多千載亦何有桑桑陰滿坡

柘湖

闕

淪此地柘山歸其瀕復驚秦時女化作湖上神世
事喜反覆孰能識涯津物變雖萬殊不惑固有人

秦始皇馳道

秦王騁奇觀不憚阻且脩萬里走轍迹八荒開囿遊勞
歌久已息遺築今尚留千載威神盡驪山空古丘

陸瑁養魚池

林塘豈如昔尚想昔時居秋草自鳴鶴寒波猶戲魚紛
紜鉤餌底瑣碎刀匕餘任公有奇術默坐歲幾餘

華亭谷

穹穹華亭谷中有不竭沅其微初濫觴其大終載舟寒
色皎可鑑嵐光鬱如浮當解塵巾纓一濯潭上秋

陸機宅

出身豈明代涉禍固以深一觀廢興迹可用當所箴高

門非昔時喬木或遺陰空令弔古士感激成幽尋

崑山

晉衰士不競識者逃其名陸生起江湖文藻振英聲遂
令崑丘號長配山不傾君看玉就毀孰與樗全生

三女岡

三女史無載于何永其名坡傳妃子逝村記昭君生和
戎與走蜀為恨兩莫平爾兮亦胡為崇岡屹如城

和胡公謹遊李寺丞北園

春郊不數到俯仰恨流景李侯有嘉招滯念茲一騁名
園帶喬樹亭榭散清影解我塵中衣觴行日舒永花團
錦纈明竹竦搖碧靜從容方罫間萬事不關省善謔寧
類鄙高歌或如郢行遵水曲幽望出林梢迴興來非外
獎理愜有真領薄莫聯歸鞍清風吹不醒

賦永叔家白兔

天公團白雪戲作毛物形太陰來照之精魄孕厥靈走
弄朝日光絕然丹兩睛不知質毛異乃下遊林垞一為

世俗怪置網遂見縈我嘗論天理於物初無營妍者偶
自得醜者果誰令豺狼穴高山吞噬飫羶腥蒼鷹撲不
得逸虎常安行是惟獸之細田畝甘所寧糧粒不飽腹
連羣落燂烹幸而獲珍貴愁苦終其生糾紛禍福餘未
易以迹明將由物自為或繫時所丁恨無南華辯文字
波濤傾兩置豺與兔浩然至理真

又賦京師初食車螯

翰林置酒冬之嚴庶羞羅列窮脆甘有餽奇味衆莫覘

久秘不出須賓酣紅爐熾炭發其鉗金鍾一引連三四
滿坐詫美謹笑談肯復重顧蝗與蚘京都貴人梁肉厭
遠致異物無微纖駢珍錯怪百類兼何久遺此不得參
乃知物用有遠

闕

南陽集卷四

欽定四庫全書

南陽集卷五

宋 韓維 撰

古詩

九日北園思臨渦之遊

吾生豈鷹鷂胡為見羈紲題鞭古勝地落帽秋佳節一
為塵事牽坐嘆高會缺天兼水澄淡樹與堤曲折更房
露應重菊艷晨可擷嘉景成想像清樽廢提挈陰風吹

北園衆槁聲切切把酒望霜空冥鴻遡遼碣

南堂對竹懷江十鄰幾

端居無所聊稍復治文字南堂冬日明窻戶煖可喜圖書羅滿前意覽不由次聊收靜者趣以亂憂人思亭亭當軒竹使我長歎喟封植苦不早顏色頗顛顛勁節亮不改虛心如有遲紆懷江夫子循道久不試邈然高簡姿不受世俗累一官才復進左謫良何亟德義我所珍軒冕安能貴長嘯汝水濱濁醪日自醺效陶有新篇

居詩多效

陶潛

翼孔著高議

君著春秋左氏傳議

絃琴坐虛室默與古人值顯

晦一其心淡然天淳粹思之不可見暑謝寒已摯諒非
對此君茲懷何由慰

夜坐有懷黎君

霜風動脩竹寒月照廣庭此夕南堂客得無羈旅情束
書萬里外徒步游上京豈憚行役勞所期功與名高文
日以麗經義素所明顧我頑鈍姿無以延英聲銜哀謝
時好守拙伏茅衡佇君取高第光華慰友生

和子華兄宴王道損公宇

濟濟高燕會衆賓且喜樂方冬氣常溫是日寒始若愁
雲際平林垂見雪花落四座喜相顧有引必虛爵中堂
豈非佳東圃羅帟幄當亭列射格抗的明灼灼雕弓既
出鏐勁矢各在握主人捐讓興客以次序作目惴綵樹
移心傾鐘鼓數笑言何謔失儀節亦稱娛酒酣事頗變
極口縱談謔失令固有罰出語輒見酌平生愛疎放論
議鄙齷齪歡來一狂散豈顧醒後忤詩人亦有言善戲

不為虐所賴衆君子闊達見表襮還家遂酩酊豈復記
鳴柝

和象之雨中見寄

沉陰子所歎幽事我為樂雨沼散圓荷風蛙亂靈葯清
涼體自正虛靜道所託誰識此中心一罇成獨酌

喜吳冲卿重過許昌

前君廣文直共宿官舍冷攜觴慰羈旅鳴絃破愁靜竹
陰月娟娟樓角星炳炳是時冬夕長諧笑得馳騁爾來

還故棲樂事成引領君方志遠擊我固分幽屏趨舍既
云異會合安可幸不謂旬浹間所得亦以併清笑煩滯
闕高談謬疑正琅琅別後篇鏗若御笙磬索居久其職
此適固為橫一感朋盍難舉酒良自慶

同戴處士遊湖

時甘陵
未平

京塵倦遊久愛此西城曲泉溫草尚青春近波先淥幽
人幸相對高論良自足蚩蚩北州民安得同我欲

同曼叔觀潁昌醖醕

前日看花花正發今日看花花欲歇
入門但見綠陰下寂寞無人委
春雪狂風飄簸百卉盡惟有清
香吹不絕攀條惆悵可奈何
與君把酒到明月

夜泊湖上

春風淡無力池色晚更靜
人歸簫鼓歇月出樓觀迴
驚鷗啄浮星遊鯉下明鏡
誰當拏畫船徹夕縱孤泳

化光東堂賦得奕棊

君家何所樂棊奕侑清興
簾垂虛堂肅子落文楸靜
機

心久已忘勝勢安敢競吾知霍將軍固亦有天幸

九月十日西湖席上得樂字

秋雲淡不飛霜水清欲落維舟坐近浦悲風滿衡薄良
遊未為晚佳節止在昨湛湛觴醪醇娜娜菊枝弱天時
倏代去所恃有行樂何能學次公忉咄謝多酌

元道席上得秋風為題下為韻送廣信舍弟

秋風感人切況在欲別者狂飈斷蓬轉寒助離樽瀉吹
雲急燕鴈獵草嘶代馬莫作塞垣聲端令客淚下

過李膺墓同曼叔作

漢衰奄寺熾威柄敢專有桓桓李司諫誓奪還君手登
門盛賢俊破柱發姦醜身雖以此亡慕者猶恐後我行
襄之野把酌孤冢右精誠有相激淚落入卮酒剖心死
亦仁減頂過何咎大雅稱明哲於君豈其謬

和太祝端居有懷叔恬秘書

鄙生復田廬疎絕豪俊後側聆楊生賢名挂時輩口嚮
風結遐想幾歲欲奔走比閭官旁郡斂板不去手沈埋

文俗間有類魚落筍頗思汭檄來一洗煩滯久覽君端
居作懷佇日延首竊高田蕪遊遂信尹公友丈夫相期
意不必銜盃酒作詩助嘉招此志非邂逅

送李寺丞宰藍田

李久
開居

君誠巖壑徒出宰亦山縣尚喜終南峯蒼翠不去眼春
風吹征車千里度灞澹到日勝事繁花光老秦甸

奉訓南陵三君別後見寄

齋居有常禁跬步不得語清謹猶反思濁酒成獨撫野

杏亂飛春隣雞靜啼午寂寥正如此坐見前山雨

雨後之南陵點饌

齋房厭危坐出戶曠舒散草木雨多思雲山晚相亂縈
回俯川陸窈窕見樓觀耳目久塵埃茲辰一滌浣

偃仰

鵲噪庭栢喧朝光來入隙祠官謝餘事偃仰百骸適回
思朝市人小大各有役區區就終盡萬古同一迹而我
遂慵散興味良不極富貴非所慕茲願儻有獲

哀傳馬

喧呼國西門驛使通萬里十亭傳一馬日夜不得止枯
腸噉芻豆瘦骨繫轡箠力盡求未息忽已仆泥滓死者
既不補存者行復爾聞古至治世微物均福祉不墜王
澤流其先在官理國家富郡邑一板萬生齒付與有失
宜得無馬之似投鞍坐太息春為悲風起

冬至日作

初陽動新館微霰集前墀舉宗會佳節拜賀儼成儀念

我閨中人獨此隔容徽昔同奉祭籩今自享酌卮髮髯
平生像淒愴故年衣寒燈清無光僮使侍虛帷對之忽
悲結零淚不可揮嬌兒何所識擣博自為嬉

切切歸許
途

我懷切切重切切今日歸當去年月香車不復故道來
血淚空霑舊行轍嚴風正射人面過凍地惟憂馬蹄裂
舉頭且願愁陰開悲攪胃腸刻霜雪

席上探得游字餞兩淞提刑張吉老

聖朝用中典前代所未侔一罰有失平天子以為憂祥
刑慎處糾輟子蓬萊丘御前賜印紙盡部東南州才豪
勇自放霜隼凌高秋清風翮兩旗八月下吳舟勉哉樹
休問考績待其尤毋忘臨觴贈義重閨臺游

同曼叔諸君登醴泉觀凝碧亭

門前車馬塵當晝塞昏霧安知此亭上秋色生四顧黃
花散晴陽赤葉變寒露境非遊覽舊人得朋從素樂幽
魚羣行賞俊鳥橫度惜無一樽酒留連清景暮

次韻和永叔種菊過節方開

皇天於萬生難用一理曉
芝蘭喜憔悴蒿艾長美好
况茲封培晚榮茂安得早
賴逢賢主人拂飾文字巧
不然彼微芳零謝同衆槁
清霜不能凋秀色出庭草
珊珊黃金明落落衆星小
人生苦多累適意會常少
在昔陶公園恨無酒樽倒
斂襟賦寒華高唱徒杳裊
幸無斯人歎一醉可遺老

又和楊之美家琵琶妓

楊君好古天下無自信獨與常人殊勤身所營世或棄
反眼不顧我以趨彼其察物類有道能取精妙遺其麤
官卑俸薄不自給買童教樂收圖書客來呼童理絃索
滿面狼籍施鉛朱樽前一聽啄木奏能使四坐改觀為
歡娛有時陳書出衆畫羅列卷軸長短俱破繡壞紙抹
漆黑筆墨僅辨絲毫餘補裝斷綻搜尺寸分別品目窮
錙銖以茲為玩不知老自適其適誠吾徒豈無高門華
屋貯妖麗中掛瑤圃崑崙圖青紅采錯亂人目珠玉磊

落熒其軀苟非絕藝與竒迹楊君視之皆蔑如楊君好
古天下無

遺吳冲卿大饗碑文

蒼碑剝龍螭突兀古殿側世變文字異歲久苔蘚蝕諒
非好事者塵土未嘗試我來仰首看百過不自息曩者
魏方盛帝丕託威德馳驅百萬衆南指斗牛域誓將殄
氛祲飲馬長江邑翠華鬱回翔高會誇故國肅肅環珮
響煌煌羽旌飾鼓鐘何鏗鏘淮漢為震仄罷饗示得意

摘文永鑒勒從臣梁孟皇隸法當世特奉詔無與讓淋
漓奮其墨爾來幾千歲卓卓見筋力端莊九鼎重勁挺
羣珪植威儀商山老氣象漢庭直惟昔銘相戈先儒固
難迹況我鄙陋極視此空嘆惜常恐日磨滅不辨點與
畫呼工摸於紙一掃見白黑緘口比瓊瑤把玩廢寢食
于時大經九有詔講謬忒刊之太學中為後代法式冲
卿邦家彥學問古今積辭端海鯨運筆力霜鷲擊況茲
服儒官洒翰固其職楷模所流傳歷世動千百自非體

法正徒使觀者惑厥初篆草隸根本君已極聊持釘張
翫庶以參得失

久旱喜雨

炎風駕京塵久旱氛侵惡羲和鞭日車光焰赫飛躍羣
生困熬暴嘉穀坐焦灼高堂袒裼卧汗下如鞭索安知
於此時乃見嘉樹落狂飄隨烟雲急洒動林薄蕭然宇
宙間昏霧一疎淪雖忤意暫豁所嘆施未博雷霆司天
令何乃久寂寞微陰雖自復陽亢不為却安得躋帝閭

一鼓造化索太上方厲政進賢登蹇諤日將太平近此
變不應作吾徒勿咨嗟坐看雨時若

和江十浮光隱者

我本巖壑性落身名利塲譬如籠中鳥飛舉意不忘常
恨此世人與古不相方爭名塞朝市養志空巖房近聞
二三子卜築淮山旁松栢手自種夏陰鬱蒼蒼晨釣淮
上石暮返林中堂琴樽自為樂過是皆粃糠乃知天下
士未易一槩量好事江夫子慕之著辭章名落塵土間

清風何激揚安知後來者不及董與黃

和聖俞鬪山鵲

稟此分鬪姿用舍在所激翻跳巧相中一敗軀命擲晨
雞鳴不渝霜隼時乃擊既無一二效豈不媿肉食

和聖俞飲會之作

幕府多俊良秉間得邀命陳觴四座合清笑發高興冰
梨走咸黽霜橘薦穰節有羞愧無珍粗竭我家稱禮酬
嫌已拘戲罰甘太橫詩誦唐人為議法漢儒正新朝時

巧發詭令或孤迸聊矜一時快豈校負與勝行傷昆弟
別且樂賓友盛但願會合頻醉日敢辭併

飲聖俞西軒

歡常以飲合歡意則非外今吾二三子共此西軒會主
人吾儒秀言與二雅配酒行倡大論文字畧瑣碎上言
評人物要當本諸內下言譏為學不以滿自槩唐之衆
詩人區別各異派一經君子評斂鑿音作棄秕糠予曰吾
聖俞名足通後代答我文如韓尚有六經在況吾何所

立間譽若抱蔓聖俞善誘掖斯語不無戒意欲令吾曹
事業進以大我雖頑無能聞此亦健快呼觴滿自引不
畏坐客怪歸來書短篇聊以記所佩

奉和興宗臘日招賓浴普光

嘉臘世所用況今以令休吾儕三四人及辰為茲游茲
游豈其遠東城大道周松檜寒色靜臺殿香氣浮振衣
聊自潔舉觴復相酬淡泊顧多思嘲諧訖無尤京都豪
貴兒良馬輕衣裘飛鷹搏狐兔馳突明星流歸來擊鮮

飲趙舞間齊謳豈不一時樂此樂異我求願君勤置酒
簡薄非所羞

送宋鈞秀才落第還鄉

漆雕不肯仕仲尼悅其然乃知君子學躁進非所先去
聖邈千載茲風復誰傳趨營不自反廉恥一以捐愛君
抱冲淡榮利不可遷讀書本仁義洞見末與顛矢志不
為辱謀道方復堅臨分求規言顧我昧所宣願君崇遠
業無愧古人賢

送勾諶太博通判潁州

西湖十里波淥靜過新雨波間黃白花繚亂不可數浮
舟翳佳樹涼風生仰俯回顧紅塵人處身一何苦君子
愛民物在樂思及溥方期推所安與衆式歌舞

送陳著作

聖俞之
官壽州

高才不沉沒奮筆動天幄古今明治亂王霸辨醇駁文
成數千言粲若玉就琢拜官諸侯府千文茲把握過別
要我贈強言慙鄙樸董生崇正義孫子陷曲學彼其趨

舍間為道一何邈願君審茲術名節重山嶽

奉送永州張中樂屯田

昔年曾讀子厚集夢寐彼州山水佳循良今慰遠人望
瀟洒仍愜曠士懷樓頭打鼓散羣吏林下啼鳥眠高齋
政閒境勝足佳句好寫大字鐫蒼崖

奉同原甫鄆州樂郊

詩人歌樂郊以政不以遊太守名是地豈非為民謀下
車布條教惠愛春風柔丹筆平枉訟赭衣息姦偷政和

歲亦豐閭里舞且謳及我閒暇時駕言此淹留雜花艷
暄朝翠竹鮮霜秋有臺下觀漁有堂前抗侯觴竿旣紛
錯管鼓亦喧啾都人從公來小大畢休休施設苟異此
且為民所仇臺高池益深不若墟與丘賢而後能樂軻
言良有由聊書太守意庶幾來者求

答師厚和叔喜病起相招

韓孟天下好祝身猶駢蛰今吾二三友幸而得相逢如
何病在枕垂見月律窮前日始能杖氣力微春蠶出門

候車馬庶幾子予從忽得連紙詩爛然亂昏瞶今我謝
百事無著如飛蓬惟知爛漫飲舍是非所通願君勤貯
酒相期雪翻空

次韻和原甫遊會靈觀

松喬去我久高駕不可攀何意塵外遊近在王城間先
帝昔臨御抱冲啓玄關營宮奉嶽鎮縹緲當人寰疏泉
抗臺殿擬迹三神山想像列仙下半空來佩環雲車倏
容與旌節儼成班翩翩萬玉女紅頰翠羽鬟世人那得

見石壇空自閒伊予厭羈跼酷甚負病瘵茲行適所願
帖若賈在闌春風吹園桃幾日朱霞殷寒碧竹間見新
黃柳際還主人非素期促具初無艱抗侯角善手持觴
發歡顏尚無形骸累安問紱與綸跋馬興不盡東池水
潺潺

答和鄰幾元夕聖俞及子過之

天衢十二大樹春樓前結綵移嵩岷游人袞袞去不已
街頭雪泥踏作塵駘它館中好古士紛華過眼輕浮雲

早休僕御謝賓客脩然乞酒邀比鄰盃盤如星下燭案
果以橘柚蒞紫蘋微吟疎笑見真野昔之靖節今冠巾
門前少年將姣婦電落馬足風雨輪長髯健兒走先後
意氣欲無夜與晨瞥然奔過不留迹肯信亦有端坐人
若無吾曹同嗜好枯槁到死誰嗟嘆

答賀中道燈夕見詒

春風揭屋沙激窻兀然孤坐如植杠酒昏兩眸澀不視
案上書策徒撝撝獨待高篇恣哦咏頓覺精銳還軀腔

前時官家不禁夜九衢艷艷燒明缸綵山插天衆樂振
游人肩摩車轂撞君於此時守經籍直欲行業純不尨
想初嘉句落紙際筆下袞袞來長江我今散懶世味薄
惟於靜者心為降江翁蕭閒梅老淡文字酬酢交矛鏃
恨無奇麗與鬪角日策疲馬參其雙能來相從不憚數
與子賦詩傾酒缸

和李大鄴幾聖俞及予見過小飲

朝朝騎馬出請道所從何所從親且舊恩義固匪它京

都衆權豪門戶高軻我苟無勢利求安事徒奔波不如
過親舊雖數無嫌訶君家庭館閒遠在城北阿惟吾二
三友暇日一來過解鞭不肯去得酒亦已歌況逢春陽
始風力漸柔和浮膏動郊壤芳萌綴林柯良辰遊不處
為樂戒蹉跎爛醉窮吾年十日詎足多

李詩有十日
醉如何之句

和劉郎浴觀音予置酒見貽

禪關嚴城側深靚闢華構方吾挾書來值子出杆後欣
然出濁酒談笑坐清晝三四同來人頗喜出邂逅牽衣

起相酌曾不煩勸侑紛披索潛逃顧壁恨無實不謂一
樽樂有踰萬金壽瓶壘忽已竭餘興不自收走登故人
堂拜敘十年舊夜深躍馬歸不畏妾婦詬

子張子夏廟同鄰幾聖俞過作

我我道旁廟庭戶煥丹黝恭聞師商賢下拜奠卮酒大
梁故王都豪傑所奔走當時多尊榮死不道人口二君
夫何為血食獨傳後豈於聖人道自托致不朽荒墳屹
相望荆棘不盈畝衣冠應作塵制度復何有得無埋竒

書文字暗科斗懷古意慘淡春風一搔首

和聖俞食笋

犀皮包玉束作斤有餽為子盤中珍愛之不欲食客衆
夜密置酒呼其隣作詩盈紙頗瓌怪胄出恐是龍之真
流涎溢吻極稱詫兩都無芹吳無蓴念我故園事裁挿
獨於此物尤勤勤春芽怒迸地皮裂採掇入撰無虛晨
獨留晚出補林罅幾日不見長過人新梢秀葉動清景
蔭藉往往鋪吾茵而今安得復致此腹飽藜莧身埃塵

和叔惠薺

君居壓城根厥產地宜薺呼兒乘晝暄培壤露寒翠
擷之登盤蔬藹蔚見春意方其下筋時絕甘遽吾遺物
雖美芹微意重生芻比苟為勢利心千金何足貴

同胡江范邵裴二宋司馬飲會靈水軒即席
賦以日暮天無雲春風扇微和為韻得日字

華軒壓春波樽酒四座密柔軟柳間風舒遲花後日晚
色簾捲靜歡興觴行疾一陪諸英遊黽勉慙落筆

南陽集卷五

欽定四庫全書

集部

南陽集卷六至九

詳校官唐吉士臣范逢恩

檢討臣何思鈞覆勘

總校官進士臣朱鈐

校對官待詔臣胡士震

謄錄監生臣劉淇

欽定四庫全書

南陽集卷六

宋 韓維 撰

古詩

和如晦遊臨淄園示元明

平津開館大道西
桃夭杏姪通園蹊
東風入林朱白動
次第裝遍枝高低
紅梅最好花正盛
我時往看歸仍携
爾來風雨就零謝
忍見踏盡隨春泥
廣文先生厭閒冷

投書結伴散馬蹄主人同僚相門出未肯朝暮甘鹽齏
歡然握手喜迎候促具並走子與妻挿芳咀甘不知去
歸舍已見雞在栖坐揮大句鄙凡近脫落塵迹登天梯
不因時節自娛放頗置白黑為愁淒我昏如此漫不省
何異車鼓樂鸚鵡長安綠酒春正美與子一醉萬事齊

送王二廣淵簽書洛中

吾嘗登嵩丘下視伊與洛王都一何壯氣象鬱回礴又
聞彼其下地美民俗樂朱宮待遊幸窈窕飛觀閣氣交

卉木茂奇艷或可愕清渠碧玉色左右隨醺鑿丹櫻結
春實紫笋翻夏籜喟予抱幽恨神往迹屢却羨君署吏
去躍馬春游薄追遊當及早勝事不可落為我謝林岫
終期蹈前約

遊福聖院呈審言諸君

殘春去無幾煩暑來已漸驅車九衢裏赤日汗兩臉投
身入佛寺廊殿邃且儼老僧一何賢為我拂清簟神輕
反無寐性達非有檢啾啾雀聲閒悄悄人迹斂却思吾

廬下此樂不為久新頻生明鏡密筍排翠琰時哉盍旋
歸塵土吾已厭

上已

欄干浮波走長橋琉璃光中虹動搖浪頭畫舸百龍首
鼓聲疊疊來塞慄我欣禊事得壯觀眼底不顧花飛飄
勸君酒到莫浪免一春佳節惟今朝

鄰幾和叔飲定力同賦

城頭片雲黑飛雨靄已至涼生芳樹顛影亂樽中翠沈

煩忽去體精銳颯生思江翁發新嘲陳子抗奇議在言
豈多同於道不為異夜歸清有餘微月照連騎

次道東軒賦惜春

得野字

青春忽已晚去我劇奔馬殘芳已掃園濃綠空蔽野春
風欲有問對酒不能把人心正如此狂雨自飛灑

同和叔飲王文正公三槐廳呈正卿

投盃送餘景休駕避初燠久嫌花攪心始愛樹清目主
人樂儒學定契均季叔疎簾翳廣坐並薦肴與菽肅肅

太尉館簡儉見遺躅中有戒子篇慘淡刻寒玉世傳盛
德茂名與清風穆公乎不可見悵望三槐綠

晉安席上作得蕉字

羞隨輕薄兒淚眼塵土下竭來精舍遊置酒樂清暇盃
盤春物少惟見杏與蕉流陰足可惜將子緩歸駕

借馬

吾生不自勉無馬以繫羈不能徒步遊鄰里更借之東
家號駛疾出門無停馳西家苦驚緩百筮足不移驚怪

同行客問我遽爾為駛也吾撒烈駕也吾逶遲物情有如此且當執其隨

鄰幾舍對菊無酒

陶公愛佳節對菊愁空盃日晏東籬下竟見白衣來今君亦嗜飲復有伊人才惜無王江州黃花徒自開

同鄰幾和叔登定力閣

清風何飄飄萬里吹曾軒側身紅塵外却視飛雲根王都屹雄勝長河中怒奔上有懷歸子心隨驚浪翻登臨

豈非壯悲傷久客魂日暮下危級且復同一樽

鄰幾晚見過小飲

朝居厭喧呶暮坐苦幽獨忽聞江翁來喜視樽中醪所
慚升斗微不足滿君腹強酌良勝無逡巡怯行速蕭蕭
風著樹慘慘雨昏燭談精幾喪言道在空擊目此興自
不淺豈要醕酤足

答聖俞設臚示客

梅侯三年江上居盤羞慣飽鱸與鱸客居京城厭麤糲

買魚斫膾邀朋徒孰親刀匕擅精巧閨中麗人家本吳
縷裁長絲葉剪藿釘餠自與尋常殊霜橙搗齏飯香稻
一飽豈顧家有無我雖目病興不淺坐想落紙霏紅腴
雕盤雋味儻可再贈子玉酒隨長魚

與江梅景德夜歸

吾交陳與謝屢結束城遊春宵燈火繁躍馬此道周懷
人邈何遠念歲忽以邁况自抱私感歸來清淚流

答和叔城東尋春

尋春之何所乃在城東隅東隅信佳處名園間精廬時
屬積雪霽田壤墳以蘇雍容二三騎並轡徐履驅僕童
怪且議寒野安所娛不知陽和氣決滂于空虛仰視孤
剌起突兀疑神扶其下萬華屋碧瓦魚鱗鋪南行歷亭
館近接棟與櫨陰草含碧色陽條散紅腴周覽氣象嘉
高步形踪舒提攜上樽酒饌不過魚蔬為奉豈非薄歡
至自有餘却思九衢上車馬何區區紅塵塞兩眼執利
各有趨雖欲求暇逸何能幸須臾君勿輕此樂此樂未

易圖

景仁次道齋禮院子與和叔過之值其方飲引
去二君以詩見謝三首

自我伏田里三駕遊上都其誰肯來顧莫與夫子如久
積疎野抱况茲病滿餘厚意不即報怕勞在朝晡驅馬
寒日中薄暮到省廬屬聞從衆賢高會羅盤盂逡巡望
華閨却走不及徐鸞儀與鴻舉其勢固自殊胡為枉嘉
藻似欲相牽掣中論十年舊見許道義徒管鮑久不作

知音幾終初豈敢忘君言誓將守淳愚

右答景仁

肅肅奉常署高門敞天街群英謹邦祠先事戒潔齋我
時過其舍值與衆客儕方聞治杯酌避去禮亦諧媿無
孟公名安使所至懷不知賢豪意未遽見弃排明日出
長篇正聲謝淫哇如畏明義重殷勤懼睽乖幾時持筆
和落紙還成措何以叙繾綣晨當策疲駟

右答次道

昔子有行邁辱贈猗蘭辭今我復來遊重貽黃鵠詩蘭
以喻芳潔擷佩正所宜鵠以興翅邈鸞皇共追隨句成
自有法意厚良不訾投非所當授乃反駁且疑蘭生深
林間藹然抱幽姿鵠有江海志孤軒謝羈雌殘折蘭色
改跂尚鵠性悲願君兩置是逍遙以相期

答呂晦叔見贈

人情紛言偽吾道本一純苟為趨嚮合不待結約親曰
今得夫子所涉無異津邀我醉華館正逢雪花春談笑

不近俗文史自娛賓明發枉嘉贈辭氣玉醴醇三復同
心言雜佩非所珍

同景仁況之諸君遊南園飲梅花下

茲園曠不涉寒草忽已芽同遊三四人及此風景嘉芳
梅如我期朱萼承素華欣然坐其下偃君初月斜攀條
酌醇酒談笑時一譁歌童雖非妍清唱凌烟霞人生自
有適豈要外物加興盡復云返修竹盤昏鴉

招景仁飲

紅薇花折萱草丹萬鈴嘉菊重臺蓮問公此時胡不飲
樂有至理須鑽研后夔已遠師曠死寂寞千載無其傳
公窮天數索聖作坐使綠鬢成華顛屠龍絕藝豈世用
儀鳳至業非公專洛陽有客金石堅持議不屈難鐫鐫
園收獨樂會真率以勞校逸寧非偏古稱兩忘化於道
此理豈不曠且然折花持酒待公醉樂至無聲方得全

和朱簿對雪

公堂寂無事默坐擁重裘餘霰竹上集寒風日颼颼哀

鴻不停征好鳥鳴相求君能於此時為我發新謳上言
有年慶幸免刺史憂下言美光景宜以歡燕酬名園抱
城角亭觀俯清溝松桂有佳色芳梅朱白稠晨昏儻霽
止當復從君游

置酒湖光亭示幕中諸君

東風不能和朔雪屢成晦置酒高亭上豁與清景對霏
微遠林表蕭散平湖內稍急征鴈羣偏凌舞姝態為藩
昧仁術撫事增永慨閭閻半無褐畎畝方興來幸祈陰

殄消庶卒豐年賚

送朱主簿

浮舟下東溪春寒花未徧共約征車行復此華堂餞人
事多齟齬臨分闕芳燕坐想竹間風雜英紛如霰

後圃偶成

氣昏聊止酒訟簡時閉閣池紅落花委岸綠新蒲合厭
暄解重衣息倦偃清榻永日林下風山禽響相答

寄題黃州德厚庵

達命斯順受務德其勉修誠已有要道茲外非所求使
君名是庵可謂善自謀端居若無營志業日以休心端
物自正化行速如郵野闢歲有獲庭虛訟無留民俗興
禮讓閭閻息姦偷可以報上恩可以嗣先猷倘異於此
道則為是庵羞

燕諸生於內集堂作詩以勉之

濟濟衆君子庠序之冠冕來燕升我堂良用慰衰蹇清
言屏絲竹善意陋肴饍茲藩實故國賢哲世多顯荀陳

沒已遠餘迹竟未踐顧慚為政久儒道不加聞雲飛之
孔翠廟薦闕瑚璉非期寵祿光或慮志業淺惟天儻有
待在已固當勉臨觴無以侑相敦在誠善

次韻和崔朝散西湖避暑

人生苦炎歊我所得蕭爽喬林無纖穿好鳥不停響馮
軒縱遐矚萬象歸一掌道心流水閒世事浮雲往豈同
中林士所樂在膏壤寄語同心人金鱗當透網

和子華兄太素泛舟香菜門

霜髯照四坐宛是商顏來舟移一水遠樓對羣峰閑談
笑盡永日聲利輕浮埃既同剡溪往亦類稽山回

又絕句

芙蓉落盡荷葉黃西風測測梧桐涼歲登訟息休吏早

林間獨坐歌還鄉

非公
境界

次韻和君實寄景仁

予年行七十惟日就志昏雖高鴻鵠舉尚困鷄鶩喧壯
心久已摧弱羽不得翻每誦少游言顧慙下澤轅蜀公

有高志謝事久杜門擾擾世俗務不復掛口論羣經雜
圖史擁坐如周垣上談千載故速若水注盆客來必命
酒左右拱諸孫雖無鼓舞懽自喜談笑溫仰高顧吾私
有類羝觸藩尚期蓬華完亦有桑榆存近觀敕子詩尤
見朋義敦卜居近吾廬指日駕君輜構堂始云基築圃
亦已樊前知會合期不慘離索魂想像入第初親賓燕
華樽談高一理會體王百疾奔共完天純粹豈識世詐
諛方笑司馬翁獨樂守空園

獨樂君
實園名

效陶呈景仁

仲冬景氣和游步獨徘徊微病忽消散我興在尊壘東
隣久廢飲百勸首不回所憂在鐘律未致儀鳳來此志
豈不佳孤論良難裁願公少置之起視甕頭醅

答梁大夫斷求息緣以躋高躋兼簡清臣大夫
人生會有本本得求自忘緣來與之俱源壯流亦長趨
高顧為下在得良已亡金仙不吾欺莊生助之揚嗟我
聞道淺妄言豈非狂緬懷終南山紫翠峨宮牆二賢謝

塵滓接翼參雲翔相望孰云遠共此愛日光

和朱少府

自我還故棲再見炎與涼朝游每含哺晝坐常焚香
擷圃得竒艷俯池鑒清光不憂飢所驅非為飽則颺同里
四三人每過必命觴濁醪無孤斟嘉果有新嘗看舞雪
翻席度曲塵飛梁桑榆儻徘徊此樂未渠央行止固有
命貴弃乃其常與君酣且歌幸世方歡康

次韻和景仁兄

既酬斯有酢在禮猶可追起勸孰曰狂狂在捉白髭白
髭雖見捉淥酒安可辭歌童小如拳聊以開公眉

次韻答景仁喜雨

涼雲四向復沴氣一消沉上天垂景貺高秋霑喜霖
槁苗變新實時菊抽芳心聆君得意句起我掉頭吟

令綽泛舟潁河作詩詒之

投閒歸里間幸與故人遇情期夙所敦邀逐已去屢尚
嫌城闕拘未盡林壑趣導河高其梁輕舟具指顧寒花

黃被堤秋實翠登俎

時有獻秋來禽者

白鬚二三翁相對無俗

語夷猶起遐想恬曠絕近慕適野詎有謀登高亦非賦
信哉莊生言忘我帶與履

景仁示去歲所賦菊屏菊塔二詩輒以一篇答
之

斯民去古遠日與巧偽遷粲粲黃金花揉屈同枉捲列
屏聳浮圖光彩生盤筵匪惟悅羣兒愛詠及華顛我欲
叱園史解結除其編萬物有本性各使歸自然

對雨獨酌

褰簾雨正繁
附火寒已薄
修竹搖清音
芳梅綻朱萼
感此時運駛
對酒成獨酌
多謝枝上禽
飛鳴慰寂寞

和玉汝弟感秋偶書

園林雨餘清
碧色徧秋草
露葉委閒堦
風荷亂幽沼
晨昏爽氣嘉
吾意欲輕矯
古來達道者
冥冥獨見曉
四序雖代換
一物未嘗老
况茲浮幼質
終非智人保
唯有至真界
日日無非好
豈同世俗情
妄計遲與早
矢詩勿庸

多萬事一能了

題吳亭

王氏

薄陰散秋曦爽氣來
孟月慨然登茲亭
嘉觀非遠涉徑
幽出深竹棧峻躋危堞
身騰塵境外心與空界接
前臨
溟波泛却視隗峯列來遠
得清飈灑迴想飛雪君家兄
弟賢問學繼先業橫經客
老師置醴延大耋方從賢者
樂豈為游子設詩人亦有言
佻達在城闕

和景仁除夜

六十復過六逐物何當足善惡兩都忘寧論擇魚肉流
光速於電至道明如燭孰謂吾廬卑隨時自涼燠

奉酬樂道

故人從我遊里閤非瀟湘文章老益壯欲掩李杜光新
詩來連翩奔走獲與臧調高豈能繼愛重如琳瑯春風
動地來急雨催羣芳梅蘂亦已落坐看飛絮狂誰能於
此時默默但退藏且傾盃中物莫顧腰下章緩舞金縷
衣高歌玉爐香

晏公作詞云金盞酒
玉爐香任他紅日長

白頭自有樂豈愧

少年場

次韻奉答君實問禪

仲尼稱無我老氏貴不仁存心一隣虛去道萬由旬入
俗權立聖達空安取真摩詰非有法還公本來人

答李先生

衆人張眼我視明明衆人開口我笑泠泠百姓不我知
我與同醉醒惟有北庵李家老足智解語通人情恐物
盜我本真處勸我閉口藏眼睛翁意我甚愧我語翁亦

聽萬物不是賊我家門畜停我勸李老莫憂驚詐稱強
盜國有刑太守行令當不輕

次韻答和樂道侍讀給事

歲豐訟滋簡拙守容晏眠起來視雲景春意亦已鮮驅
車望南城精廬屹當前華堂坐沈邃遲日步暄妍流覽
高僧壁稽首金像蓮即事豈非適感懷良慨然宮藩與
鄉閭早接二公賢高文炳羣宿大論傾長川爾來曾幾
時急景凋朱顏從容味真理蕭洒賦高篇豈無安民策

坐惜成弃捐尚期雅正音入和薰風絃余本巖壑姿臺
閣繆見延淵明亦有言誤落塵網間命固有行止理非
可控搏素髮紛已垂行當掛吾冠側聞治林圃栽植及
晴天芳芽吐膏壤柔條擢暖烟光景非我力為君導鳴
泉

比園栽植甚脩而尚缺
池沼竊欲助君成之

次韻謝尉公靖同遊北園五首

我本巖壑人何意裨袞闕一從譴逐歸林下聊散髮步
堤得幽花照水見新月即此窮朝曛平夷免歌蹶

陰陰喬木交疎疎修竹翠黃花與丹實夾路何瑣細是
辰雨新足支策問田事一感孤征鴻淚落衣襟際

昔常同子

華兄
游

鑿堤要水近依竹任逕斜殘葉時委地晚笋猶穿沙不
知人間世况論空中花却思城市喧閣閣鳴羣蛙

今茲冬已孟青林猶蔽野愛此晴景嘉置酒衡茅下緬
思陶公句異代同瀟灑結廬在人境而無車與馬

九夏困炎毒出門如探湯不知此幽亭俯仰皆清光寒

流給我濯白雲供我望況有尊中酒猶泛殘菊香

奉和太素見詒

幸有新醪對新菊莫嘆樽前光景促請公更唱自為詞
緩奏金絲續銀燭

南陽集卷六

欽定四庫全書

南陽集卷七

宋 韓維 撰

律詩

寄秦川馬從事

往歲遊西謁李長隴雲秦樹勝風光分題紅葉蠻牋膩
對舉流霞綵袖香宴洽翠娥連象榻夜寒嬌鳳泥銀黃
未知早晚重携手惆悵而今鬢已蒼

春霽憶洛陽

少年結客洛陽時，閒傍東風駐馬蹄。
山色遠饒潘岳宅，波光輕撼窈娘堤。
花繁到處紅如堵，酒好尋常醉似泥。
賴有金臺舊知己，已應憐魂斷虎牢西。

雲

抱石情雖久，為霖意若何。
天心如見用，風力不消多。
冷濕朝仙洞，寒迷宿鳥窠。
飛揚終得路，曾入漢皇歌。

雪

屏翳驅雲結夜陰素華飄墮惡氛沈色欺曹國麻衣淺
寒入荆王翠被深天上明河銀作水海中仙樹玉成林
日高獨擁鸛裘卧誰乞長安取酒金

東郊

東郊絲雨破浮埃繡騎尋芳兩兩來十畝霜陰青翳目
一篙溪色碧於苔林花泛日鷺求友壠麥含風雉應媒
綠柳朱欄多酒市杖頭誰伴玉山頽

春朝

燕語聞多日蠶眠過幾宵花深不辨蝶柳暗欲迷橋便
面金環重障泥玉勒驕黃公酒壚上誰貫阮孚貂

晚春

春暉東去月如絃却拂凝埃敞北軒幾曲雲屏空白晝
一簾花雨自黃昏庭蕪碧合陰虫息窓樹紅稀鬬雀喧
細憶舊歡都入夢習家池上子山園

題余山人壁

一室閉香林蕭然物外心碁聲敲月重履齒印苔深竹

徑茶烟細山園鍛樹陰會當逃世網塵事締朋簪

水閣

約畧橫雲島欄干瞰玉淵雨汀翹睡鷺風樹咽嘶蟬綠
髮莓苔地紅衣茜茜天夜深三弄笛月在釣魚舩

戲月

缺處還孤守圓時亦獨棲何曾聞合璧只見是如珪桂
子遺秋信方諸寄夜啼建章殘漏促又伴玉繩低

和曼叔

子華慶
州會上

官路飄蓬奈別何塞垣相見此情多酒樽重喜為親壽
華髮猶能繼子歌行樹坐思新種色斷水應泛晚來波
紫荆山下游從少獨把雕章醉後哦

長安留別七弟兼簡劉郎

二年牢落坐回山平日交親夢寐間關外相逢非素約
樽前一笑慰衰顏康衡汭牒朝廷遠王粲從軍幕府閒
跋馬題詩離緒亂霜風蕭颯鬢毛班

和原甫見送

德義良所慕風霜輕此行放歌留客醉高詠見公情祖
帳重開席郊原少駐旌還知別後意寂寞對柴扃

送呂寺丞

娶婦歸省親
乃赴邠州

古有從軍樂人今衣綵行春風騏驎健朝日鳳凰鳴樹
遠秦中道花繁塞下城篇章聞舊俗當為放遺聲

元日寄袁州仲文兄

前日都門盡鷁飛秋風執別淚交頤清朝遠謫庸非命
直道終申自有時佳句應因子卿賦

道出蘇臺
見蘇子美

勝遊仍

共鵲鵲期

六弟在錢塘

宜春臺上春歸早誰伴花前酒一卮

九月十日遊象之葆光亭寄曼叔

幾負高陽約蹉跎此歲華論心看翠竹感事對黃花寒
日悽征鴈清霜急暮鴉臨風一樽酒回首意無涯

送戴處士還廬州

早識浮生妄欣陪達士遊觀心非本有於法尚何求煮
茗林間寺題詩湖上舟還嗟別後夜風雪擁貂裘

同子華仲連二兄遊湖

濁酒非陶令方池似習家放舡風動柳著岸水

閑

象之席上賦得寒字

愛子林亭勝高秋駐馬鞍梨紅先著露竹碧自生寒慘
戚傷多事淹留強一歡所嗟怯杯酌不得倒吾冠

同曼叔化光遊卞氏園

野圃無人到秋風共子行花臨流水落草上廢臺生氣
晚才看菊天寒不見鷺幽閒固多味濁酒詎須傾

和晏相公答張提刑州名詩三首

頌聖

文德綏中夏威靈鎮遠夷恩靈滄海潤基業泰山維漢
曲白麟應虞韶丹鳳儀偽儒蒙景化鼓舞慶淳熙

講德

上德欽明代中階翊亮司夔龍曜勲業鸞鳳肅威儀復
古高文麗為邦惠化綏還當奉侯瑞歸輔太平基

陳情

濠上蒙莊達田中彭澤歸安能陳道德直可景光輝欣

奉燕臺集恭陪漢相威陽春回麗曲清越滿金徽

西湖雨中同公懿諸君飲

席上得
空字

十月平湖上繁霜藻荇空柳枝橫墮雨波白細生風水
鳥飛幽碧寒花折淺紅誰能盡一醉燈火宿船篷

答臨淄公見招

帝思元老付關西公受兵符與命圭應識疲羸須鎮撫
便期愚散豫招携漢家宮殿看龍首秦地山川入馬蹄
自愧不才多病者空哦嘉句滯幽棲

獨坐

雪屋生寒勁風燈落燼頻驚號獨過鴈默坐未眠人世
事存傷沒年華故換新還將寂寞意強與凍醪親

過卞氏園亭

桃李郊扉靜東風拂面柔偶陪連騎客來作探春遊斜
日池邊樹輕雲城上樓不須花艷動一醉且淹留

西軒會中與辛楊諸君同賦

得深字

一笑聊為適非關事賞心芳菲逐風盡時序感人深世

事無多問香醪且細斟更須乘月色瀟洒坐中林

再遊卞氏園亭

多謝春風意殘芳得我遊綠陰人去遠翠竹鳥啼幽醉
舞紛無次狂歌漫不收林間簇車馬欲去尚遲留

象之以山藥見贈

龍山有遊客贈藥滿筠籠葉漬沙泉碧苗分石竇紅斲
應侵曉露來喜及春風却笑丹砂遠卒勤勾漏翁

和象之同孔寧極遊石橋且簡寧極

春風杖藜客同到石橋邊引袖披雲木携樽俯澗泉
花聊採摘野器不雕鐫俯仰元和內熙恬太古前草心
柔可縮蒲葉密於編澗麀來窺坐沙鷗不改眠濛濛桃
李雨冪冪薜蘿烟舞類雩祠日吟非楚澤年魚跳聞急
管鳥語似么絃紫翠羞薇蕨清香襲蕙荃亂流時揭厲
微逕巧縈穿德義心誠服山林性所便敢令然諾負直
以事為牽圯下履終跪溱邊裳且褰春醪可益釀况有

帛箋箋

寧桓近有束帛
之賜故戲之

晏相公湖上泛舟賦

小雪未成寒平湖好放船水光宜落日人意喜晴天雲
薄翠微外禽歸莽蒼前上公寬禮數清醉亦陶然

城西二首

繡鞅金羈十里塵共傳恩詔樂芳辰千重翠木開珍圃
百尺朱樓壓寶津御麥初長遮雉雉官花未識駭遊人
自憐窮僻看山眼來對天池禁籞春

西城馳道直如絃百頃晴波御柳邊韶樂鏗轟羅帳殿

春旗偃蹇近樓舡
曲江未賜唐家燕
靈沼空思鎬邑篇
幾日金輿下閭闔
魚龍奇戲出中淵

和仲連兄城上晚步

久積端居滯聊為散步游
青苔跳怒黿綠樹矯鳴鳩
雨暗橫舟浦涼生調角樓
不妨乘晚興更盡水西頭

和象之北軒書事

舍北多嘉樹重陰及四鄰
清風常滿竹好鳥不驚人
圖史無它物謳吟佚此身
應容千里客一醉倒冠巾

久雨奉懷象之九兄

蕭洒崔居士高閒養性靈
涼風滿樽酒永日一函經
竹色垂遮戶桐花開滿庭
未嗟相見濶交照本忘形

同士則遊西湖

今日西湖好來遊未覺喧
柳枝風處亂花艷暖中繁
橋遠歸人渡舟移集鳥翻
何須更樽酒道勝有清言

別本作何

須樽
酒樂

和象之河上見懷之作

一昨芳郊祖畫輪
索居南北對殘春
忽傳河上相望意
未覺庵中獨處人
幾有高懷投絃冕
尚緣微祿走風塵
世間萬事徒勞耳
清潁歸來理釣綸

謁晁大夫廟

春草空庭綠無人
驚自飛英魂傳廟食
遺像儼朝衣弊
大謀何卒才高禍所歸
空令策畫士千古鑒危機

暮春遊卞氏園

路出清陰下殘花著馬蹄
過城春水靜度墅野橋低
池

廢青蘋合林深綠笋齊流鶯知我恨落日再三啼

遊象之葆光亭因以寄之

東亭不到久雙桂長新梢窓靜蟲收網簷低燕護巢晚
花紅自照繁笋翠相交清景成虛委知君嘆繫匏

西軒雨中期象之夜話

積雨空堂暮清宵獨掩門陳編徒自對幽興欲何言碧
草生牆角丹花發竹根聊持靜者轍一與道人論

晚過象之葆光亭戲呈一首

蕭洒崔家宅重門一逕通竹烟虛晚碧花雨重秋紅傲
睨憐苔石徘徊俯桂叢自期新月色不為主人翁

送休上人之荆門玉泉寺

憐師真達者於世了無求萬事漚起滅一身雲去留樓
臺金地古風雨玉泉秋安得超塵網相從物外遊

遊龍興寺

空庭落葉赤聯步得幽尋蘚剝殘碑字塵昏古象金菊
烟淒晚秀松日淡秋陰南陌風埃滿禪關只自深

飲方君舍晚歸

慘淡秋原思歸鞍暮向城野風吹酒散寒日上衣明躑
躑樵兒聚喧呼獵騎輕村醪處處熟准擬數來行

謁漢高帝廟

魂魄應遊沛空嗟廟貌殘蒼碑火剝裂畫壁雨闌干帳
幙虛風肅松槐白日寒陞堂欲進拜猶怯戴儒冠

雨過化光西齋

華屋衡茅接閒門杖屨通客來非載酒君坐正書空白

菊晚霜後青蔬寒雨中從今日無事來聽竹窓風

穎橋會曼叔坐中寫呈

朔雪清初霽風生翠栢陰星辰寒殿近燈火夜堂深坐
愛溫爐密歡從濁酒斟何當老吾里杖屨日相尋

坐中呈寧極

歸馬繫庭栢張燈開酒樽留連遙夜飲款曲故人言清
笑非無適長歌未覺喧它時相望意雪屋倚雲根

答方祐甫感懷見示之作

壯士何憔悴寒郊獨掩扉有親垂素髮為客化緇衣風
雪燈生暈塵埃劔失威多慚佳句贈無力助騫飛

同辛楊遊李氏園隨意各賦古律詩一首

臘近雲容變陽生日景添偶然回晚轡相與坐晴簷水
綠冰微泮沙明雪尚霑弄襟風力薄著履土膏粘驚鳥
不成下寒魚猶在潛翠深荒岸竹黃折敗池葦礙徑藤
梢曲鈎衣棘刺銛辭鋒憐子淬閒癖詎予砭自以清談
勝寧非樂事兼春芳有近信頻此醉厭厭

自靜教院晚步溪上

雪盡岡頭路風和臘後天人安閒淡內鳥下寂寥前凍
水晴初浪荒城晚自烟西橋車馬急歸意尚留連

自城南濠上步月之葆光

厭踏塵中路遠尋濠上行水聲喧夜暫月色滿春城衍
衍交遊樂依依里巷情優哉不知老何暇慕軒纓

遊北園賦

多病傷春客經時獨掩扉偶隨游騎出已見落花飛芳

草微迎履香風細弄衣扁舟可載酒便擬拍浮歸

清明北園泛池舟中作

路遶高林盡舟篷出近灣鳥啼青竹影人對綠波間野
色平當坐春愁巧作顏已知湖榭近飛絮落班班

送王奉議知吳江縣

聞說吳江上長橋百丈虹螭粘能固本

螭粘其北水不能敗陳承議云

人度若乘空明委三秋月清來萬里風君知此為政名
惠廣無窮

孤鴈

節物何催逼
翩翩不可留
楓丹相渚暮
蘆白楚江秋
隻影侵霜月
孤鳴入戍樓
闕雲路杳安穩
過羅浮

陪寧極游南谿夜還山墅

南谿晚酌罷
歸路笑言同
家在碧山下
人行清露中
鵲飛斜映月
蟲響暗移叢
下馬兒童喜
誰知為德公

字谷道中

驅車背河去
難犬幾家村
山斷春風急
雲生野氣昏
涉

溪沙水亂步逕草花繁谷口多幽思青林啼鳥喧

同化光陪寧極之漁陽城

不踏南溪路于今五換春能來再聯騎還是舊遊人置
酒真乘興談經或入神歡餘不無愧林壑未還身

之石橋

是日風陰異常

聞說西橋水樹間不辭驅馬涉風烟踈籬老屋臨官道
瘦棘荒茅蔽石田欲下鳴鴉盤木末遠來驚雉落山前
瓢中幸有村醪美不怕春寒雨滿川

臨汝遇雨

回風蕭颯過山西一望平郊雨脚齊
但使農疇蘇早稼敢辭客路踏春泥
暮投野寺明燈宿聲入幽窓綠樹低
明日塵清洛陽道呼童嚴駕候晨雞

普明亭賦

楊柳飛花盡櫻桃結子成
蹊陰空淨綠野艷有孤明訪
古重來地予去歲嘗游傷春獨望情
幽禽亦何恨百種向人

鳴

列子廟

廢壘荒祠古空庭獨樹寒精誠塞畫帳事迹問黃冠晦
昧塵籠墨淋漓雨壁丹冷風滿簾隙仙馭或盤桓

和晏相公答邵校勘

兩朝典策成揮筆二府勛庸在運籌歷踐枯榮皆德舉
重陪間燕是恩留康寧必有神明勞蕭洒真無世俗憂
早晚安車賜高退碧嵩清潁從公游

和晏相公初春

春物華猶少春風思已多
新黃先入柳微綠自生波
酒興潛傾倒詩情暗揣摩
流年不須問判作白頭歌

和永叔病中寄諸君子

幾日東風獨掩門忽傳佳詠感芳辰
應緣高位須憂國未必多情便負春
過眼只看花艷疾驚心初見草芽新
狂吟爛醉無拘束始信光陰屬散人

依韻和冲卿槐花

翠葆連陰直黃金布藥齊流塵
一開眼急節重含悽蝶

冷相携去蟬清無數嘶翻風隨御水帶雨落秋泥自喜
彫零後何嫌採掇稽朝綏暎晨入游袂拂宵携慘淡林
烟早輕明樓日西臨溪如有此當似武陵迷

送沈學士知常州

毗陵今古號名州況是風流得隱侯吳岫稍迎雙隼旆
洛塵凡敝幾貂裘預期庭下無囂訟還向樽前作艷謳
去去國門誰不羨畫舫烟浪入清秋

和十姪喜象之來飲兼簡龍陽孔先生

世事茫然劇轉蓬一樽何意與君同從容談笑皆塵外
恍忽游從似里中還有桂華來靜夜稍驚梧葉下秋風
欲論歸去令人愧高卧襄陽有德公

重陽對雨招介甫

積潦行車絕高春閉戶眠蕭條黃葉下冷落菊花前廢
卷怜佳節銜杯想少年君來慰愁坐廐馬疾於烟

答楊辛二君重陽對雨見寄

秋風吹雨入荒城城下籬邊菊艷明佳節相從平日事

新詩遙寄故人情
浮沉薄宦非吾願
俯仰流年只自驚
早晚郊扉收退跡
南阡北陌重逢迎

奉和府判學士景彞喜雪

朔風收盡凍雲漫
細灑狂飄入夜寒
潤浹土膏謠萬俗
喜聞玉色舞千官
川原誰作呼鷹出
樓觀朝宜跋馬看
亞尹勤民流詠嘆
一章高唱掩幽蘭

奉和介甫正月二日

春意來何早
乾坤潤澤中
雪明初照日
雲斷欲隨風
世

事蚊蚋過身謀鴈鷺同諸君亦詩酒吾道未應窮

何龍圖赴上秘閣同諸君賦詩

華閣岩峩冠道山羣公清曉集初筵獨持金印承新命
重對牙籤識舊編英俊雍容欣接袂文章踈濶愧懷鉛
一時高會形風什留作儒林故事傳

和中道遊金明池

出苑花光朱雪動壓波橋影綵虹搖飛揚鷺鷥驚高管
偃蹇魚龍近畫桡早識浮名身外事久判閒日醉中消

幾年寥落同遊伴還喜春風並馬鑣

江亭晚眺

日下崦嵫外秋生沆碣間清江無限好白馬不勝閒
雨過雲收族天空月上彎歸鞍侵調角回首六朝山

和三兄題蜀中花園

勝事常歸蜀奇葩又驗今仙冠裁樣好彩筆費功深
白豈容施粉紅須陋間金不嗟珍賞異千里見君心

南陽集卷七

欽定四庫全書

南陽集卷八

宋 韓維 撰

律詩

廢烽臺

耆老不可問高臺荆棘間
一時戎馬散千古暮鷗還
事往孤鴻斷人來落照閒
興亡無限恨慘淡對河關

和聖俞天津橋聞歌

飛雪朝來霽朱樓月下過絕雲看麗構裂玉墮清歌醉
燭輕搖箔游鞍不動珂回頭少年樂慘淡一悲哦

宿西京府署晚遊東池

時晏
獻留

牢落悲春事蕭條作晚遊清光溢平沼涼思近高樓碧
樹森將合朱欄渺若浮公來慰羈寓華月許移舟

遊龍門歸

馬
上
作

洛浦殘芳盡來尋關塞春青林橫石閣翠壁涌金人澗
草薰衣晚松風落面新愁驅向城騎還踏九衢塵

宿紹隆院

東來鳴棹落河干喜見孤幡佛樹端
不謂塵埃走符檄
尚逢池榭拂衣冠清風明月還相見
濁酒枯茶亦自懽
寄語京城騎馬客優游到底是閒官

紹隆池上對月

野月來何處東池柳影深微生水風力稍散暝雲陰
冷極螢沈草明多鵲動林欲知清絕興不寐有孤吟

野步

目倦風塵觀身疲鞍馬行春沙迎步潤山雪照懷清水
初消色林鷗欲乳聲物華多感觸一動故園情

武牢道中

春寒驅傳馬西度虎牢關草樹高低雪烟雲左右山英
豪攻戰地風物笑談間俯仰看今古翛然百慮間

過邵先生居

竹塢斜開逕茅簷半卷書幽閒入高卧淡薄見平居亂
水隨醵引殘花不掃除因君動高興回首想吾廬

浴普靜同江二李叔中道賦

夜來飛雨濯殘芳
綠遍童童佛樹行
把酒可勞悲暮節
振衣還自喜微涼
清簾不下輕颺驚
別院時來暗霑香
自是嵩陽欲歸客
為公聊盡次公狂

冬夜

繁陰掃無迹
庭雪尚餘光
屋背生寒月
林梢綃暗霜
昏瞳頻廢卷
悲淚易霑裳
却想故園夜
張燈宿草堂

同鄰幾原甫謁挺之

河面參差結凍漸清風不展畫船旗偶驅羸馬知何適
獨過長橋問所思可喜身閒親濁酒未忘心競是枯棋
憑君莫唱陽關曲自覺年來不能悲

挺之善
歌此曲

寶奎殿前花樹子去年與宋中道同賦今復答

宋詩

長條飛動不依欄淡粉濃朱巧作團無語不辭終日立
有情曾是隔年看春羅試舞衣新換古錦藏詩墨未乾
我為愁多悲節物欲酬佳句淚霑翰

送河秘校高主簿良原

平時太學客文藻士林傳
憔悴尚一邑聲名空十年
風烟長夏始關塞濁湮前
莫作歸來嘆將軍好薦賢

湮隸渭之

即府

奉同中道錄宿南宮思寶奎殿前花樹子

曾見芳春二月時
弱枝繁萼動輝輝
難忘絕艷驚心麗
重惜良遊與意違
好事幾人能載酒
感時今日為霑衣
南宮老樹無妍思
坐想東風絳雪飛

依韻和貢父見寄

早接英豪論常多伯仲賢風塵一會合歲月幾徂遷稟
性成樛散干時類鑿圓論心誰合者握手子歡然經訓
開前古談辭屈老先春遊同爛漫醉樂屢回旋樂事嗟
難久離襟悵獨偏驅車清汝曲佐幕紫嵩前官興惟高
詠人生得晏眠丹鉛塗舊史杖屨接幽禪嘆息春期失
嘗有此約淹留夕夢牽非因傳麗唱何以慰勞悁

和原甫對月招江梅不至

塵事無時已歸休慮暫空
超飆廣庭步蕭散葛衣風
默與清樽對心期靜者同
獨憐新月色百過達幽叢

和原甫立春日拜賜歸不赴鄰幾會

上閣羣公拜賜歸九衢春色遍熙熙
後房絲竹爭相命窮巷簞瓢亦我期
濁酒滿樽聊混俗嘉蔬登俎在隨時
劉郎固自多幽思門掩東風獨賦詩

和鄰幾前歲同濟川原甫賞閣後杏花今茲對
之有懷二君

春風幾日到蓬萊仙伯初驚杏藥開
遶樹獨聽清夜漏
懷人空對昔年盃坐憐珍賞同心隔
愁見新芳入眼來
欲折繁枝有所贈九重丹禁照瑤魁

雪中同鄰幾出游

絮糝瓊霏浩滿空
平明騎馬入春風
九重城闕寒光外
百萬人家喜氣中
不學閉門徒自潔
且欣攜酒與君同
柳梢花甲從今始
便好尋芳下苑東

晚過鄰幾官舍三首

炎日來休騎紅塵喜放船波平涼洗馬樹淨晚吟蟬風
至披襟後雲消倚拖前潭心見華月歸意一留連

車馬東橋絕涼風滿夕軒水聲通沁苑樹色入夷門每

接淵明詠常懷仲理言滄洲如可約盃酒會重論

水北
入柴

氏主第
故云苑

蕭洒君官舍從來可數來養蓮疏濁水薤草出荒臺
散初成籍蒲長欲暝盃吾知蔣生逕不為俗人開

連日休務過鄰幾

廣文自古無羈束
況復三逢著令休
縱酒不防官長罵
驅車聊過故人遊
閒中日月隨方罫
遠外風雲入小舟
准擬牆根菊花好
共乘清露賞高秋

和歐陽內翰內直對月見寄

新銜佳命上金鑾
遞直連初寢未安
霜氣稍依羅幕重
月華先近玉堂寒
詔函裁罷騫靈鳳
詩句書成舞瑞鸞

學省地閒清賞隔
懷賢空向斗杓看

是夜亦當
直宿太學

和永叔內直晨出馬上口占

天門朝日照崔嵬，車騎雍容下禁臺。
清景每將詩思遣，高情不為寵名回。
山林豈要須長往，軒冕當知是儻來。
欲與明公論出處，會乘飛雪旁金罍。

和永叔思滁州幽谷

滁陽山水翳荒榛，公為開治物物新。
自作嘉名遍華牒，連題秀句入青岷。
泉聲尚記巖寒夜，花思偏憐谷暖春。
絕境坐馳高興動，安能碌碌久風塵。

和子華兄同永叔飲三班官舍兼約明日飲永

叔家

視草名臣潤色才玉墀晨退共徘徊朝廷無事文書省
臺閣相歡笑語開少厭賡酬停落筆旋尋歌舞約銜盃
廣文主簿官閒冷不是詩情豈合來

寄題周著作江山縣溪亭

結亭遐僻古江山勝絕終為好事傳溪泛夜聲來枕上
峯回午影過樽前禽魚舊識應相樂花木親栽益自憐
我抱滄洲未歸恨羨君生計有林泉

和永叔從駕謁景靈宮

馳道塵清生紫烟
帝臨原廟拜衣冠
日華先向金輿動
霜氣猶通玉仗寒
後騎綿裘明粲粲
侍臣瑤佩響珊珊
一聞佳句歌熙盛
不減都人夾路觀

和子履再遊李氏園

翠竹蒼林顏色老
游人安得故時同
沾衣似對金城柳
握管翻悲楚水楓
新鬢旋驚吟後白
好花猶記折來紅
須知世事徒勞耳
惟有清樽不負公

夢得詩有十年楚水楓林下之句

奉和楊直講除夜偶書

楊公白首困青駟坐對流陰頗自嗟
半夜星文窮斗次
平明春色徧人家
漫將愁思驚天運
好看新詩待物華
何日一樽相就醉
為君先探此園花

諸君有北園探春約

和周仲章出郊

萬里青天洗曙霜
秋曦滿眼對晴光
掃殘遺秉川原靜
折過寒花逕隧荒
偶入名園逢漆吏
遠尋香剎問支郎
浮生寵辱何須道
幸有田家濁酒嘗

奉答宋中道服除還朝示親友

喧然佳句落神都哀此援琴尚有餘未見校文登子政
空傳為賦似相如道存固可輕華冕談進當知得異書
推轂賢豪非我事所期詩酒樂朋裾

許昌道中

荒郊不可望極目盡傷心目薄不開凍風淒還作陰倦
鷗飛赴馬寒犬吠依林賴有瓢中酒愁來一獨斟

謁象之同諸君步之東禪院

二年憔悴走京塵
匹馬歸來訪四鄰
足滑舊諳城下徑
眼明重見里中人
青蔬不沒荒畦雪
翠栢常留野殿春
風物自如人事改
夕陽哀淚落衣巾

清漣磯獨坐

綠篠清漣得釣磯
制名翻與實相違
沉鉤不忍潛魚亂
迴棹常侵宿鳥飛
林霽散餘知月上
水風清極怯秋歸
興來詩就觴來盡
不信人間有是非

謝微之送鴨脚

拔爾蒿萊際微根僅自支勞心勤一溉拭目待三移

世傳

此木三
移乃實

穠李慙同列芳橙合並枝絳囊如有惠莫忘贈

君時

北園坐上探題得新杏

紅蘼隨風盡團枝泣露光葉深驚乍見實小貴先嘗
綴憐餘萼飄零惜舊香不須悲節物且喜手中觴

送洵陽王令之官

離馬嘶高樹郊原夏景深還持長者政往慰遠人心
種

黍侔千戶張魚盛
百金江山永嘉詠
時寄草堂吟

答寄廣信六弟

才見高帆落歸艖
又携輕釵逐戎麾
步兵厨裏仍多酒
王粲軍中不廢詩
絕塞風烟通夕靜
近關榆柳識春遲
花時不得同嬉賞
腸斷東風把一卮

九日席上賦得茱萸

寥落霜園樹
萸房獨照秋
實兼蘭佩結
香近玉卮浮
嗔藥醒殘醉
綬紅感舊遊
三英佳句在
殊喜繼風流

杜甫
朱放

王維號
三茅叟

九月十日寄曼叔

在象之葆
光亭作

幾負高陽約蹉跎此歲華論心看翠竹感事對黃花寒
日悽征鴈清霜急暮鴉臨風一樽酒回首意無涯

和之美春日對酒

高軒怒馬一憧憧天子端居寂寞中綠酒細斟消暇日
朱絃緩撥對春風官閒勢利無從入道勝紛華豈易攻
即此便堪遺萬慮可憐夸者自窮通

又和寒食感懷

絮飛絲墮滿春陰嘆息流光節物深
難鞠自喧游俠地
驚花空思長年心寂寥功業看孤斂
淡薄情懷寄素琴
我亦新來有華髮並須攜酒白頭吟

答楊之美春日書懷依韻

久宦憐官薄端居惜歲芳
世情徒枳棘吾祿自松篁
鐵撻敷經暇檀槽度曲長
浮沈歸濁酒感激見新章
守道言何固安時志不忘
慙無推挽者祝子壽而康

次韻和唐公北使途中見寄二首

文史平居樂塵埃
少別心都門開
柳色樽酒駐車音
漢節光華遠春風藻思深
一聞傳麗句清興霽盈襟

殘紅著樹春無幾
悵望君家綠玉杯

唐公家有之

美酒應容

步兵醉後堂先約戴崇開

史局坐寢戲呈崇文掌學士

閑官身散誕飽食坐歌斜
永日槐陰靜清風葆鬢華
廢書良愧馬落帽偶同嘉
此適誰知者逢人莫浪誇

和景彝聖俞馬上見槐花

次韻

天津南望兩涯間
翦若青雲乍吐山
花葉相催何日已
塵埃不斷幾人閒
郎官蕭洒裁詩麗
博士龍鍾嘆鬢班
我獨無詩亦無嘆
朝驅羸馬暮知還

寄溫州希用上人

炎塵滿天地
懷子邈湖江
築隱雲峯亂
棲禪石樹雙
學禪仍慕孔
詩放欲兼龐

禪家龐居士詩百篇皆放達之言

蕭洒高吾興

清風卧北窓

和六弟苦雨

雷激霆奔夜復晨
天街流潦沒車輪
清風皎日收無迹
妖蜮頑蛟亦有神
海至已驚占習坎
汨陳深恐敗彝倫
蒼生可念非吾力
漏屋頽垣不庇身

送思上人南歸

塵埃不可久歸卧
故山秋榮利非其
好風騷得所求

自師

云某來不營號服
而多求詩以歸

晨征隨社鷺
夜宿近江鷗
聞子禪林

勝它年一繫舟

送李瑜屯田通判潤州

耳熟江南勝事傳，聞君官去便脩然。
江流截楚紅塵斷，山勢吞吳秀色連。
紫蟹迎霜新受釣，黃花吹酒正當前。
嗟予不得從斯樂，坐看秋風發畫船。

次韻和之美十日菊

孤根隨地發繁蕊，破霜遲但取凋零。
晚何憂賞愛移物，情傷老大人事閱。
興衰會有陶彭澤，清樽與重持。

寄題劉仲更澤州家園

聞君有佳尚買勝不論錢逕鑿蒼林蘚亭開翠壁烟從
花窮洛譜得石記唐年數卷書盈萬言章木以千晨昏
板輿往社臘燕觴傳予亦耽幽事西風一慨然

奉和喬年館宿

蓬萊仙構斗魁旁遞直初登漢署卽雲向城頭收暝色
月從樓角放寒光行看砌菊嗟殘艷坐對書芸襲暗香
景物過清渾不寐素經讎罷得新章

時喬年
校醫書

又和館西迎駕

宮樹烟開敞禁扉
儒冠羅立望天威
霜清廣殿鳴鞘肅
日上觚稜翠蓋飛
玉勒吧鞍龍在御
錦衣腰劔士成圍
暫來直舍支頤坐
却聽簫韶輦路歸

覽楊樂道洛下諸詩

昔驅羸馬望嵩雲
正值嵩陽躑躅春
千古廢興都邑地
百年勞苦宦遊身
曾耽勝事留連久
忽見新詩嘆息頻
君欲買山能遂否
它時願作社中人

和仲吳誚京塵

輕如游泛至如馳朝雨才暗暮即飛常恐旱風增氣勢
却教晴日損光輝衣縉京洛言何驗纓濯滄浪志尚違
此物無情君莫誚九衢聲利走輪駟

送石昌言歸蜀

省署聊休直皇恩許過家朝廷寵儒雅車騎有光華行
色星垣動襃章宰樹加遙知蜀父老夾道競咨嗟

寄題蘇子美滄浪亭

聞君買宅洞庭傍白水千畦插稻秧生事已能支伏臘

歲華全得屬文章
騫飛靈鳳知何暮
蟠螭蛟龍未可量
莫以江山足清尚
便收才業傲虞唐

和邵興宗再還館

莫嗟華髮尚蓬瀛
自古儒生半滯榮
學似楊雄老天祿
才如嚴助厭承明
一簞聊喜安吾道
幾騎當知達此生
聞說東郊可攜手
能來從我並鞍行

送劉巽殿直官蜀

車馬蕭條西出門
憐君宦薄意能閒
並遊多得賢豪士

久困獨無憔悴顏白酒園林休洛社

洛碧里

黃花風露見

岷山男兒滯古來有收取功名晚節間

送衛真晏太丞

才名宰相子二十取辭科得縣古稱厲登樓朝見渦疲
民勞賦役靜理足絃歌八檜仙祠在知君秀句多

同江謝王出郊

東郊二月天寒盡未成暄永日青絲騎和風綠酒樽
逕抽萱甲細牆倚杏梢繁爛醉誰知者行歌入國門

寒食出郊

都門氣象雨餘佳，壓盡風塵見草芽。
日薄風和近郊路，朱紅粉白遠林花。
堤開獨去嬾珊女，柳下相逢輕轅車。
絲鬢未催樽酒在，不須辛苦問年華。

送晁懷州學士

儒館讎書舊侯藩，請節行山川猶古氣。
銃吹自春聲問俗，憐彫瘵頌條賴簡平。
從來冠河內，誰復繼聲名。

又

退傳清門世有才使君嘉譽藹中臺未甘文墨工彫篆
聊取圭符試剗裁壘上勸耕春晚晚山前聞笛月徘徊
明朝建隼臨長道回首仙廬拂斗魁

觀音精舍期鄰幾未至

懶驅羸馬傍朱門來對祇園寂寞春撩亂遠樓唯有燕
蕭條垂箔更無人未回山簡池頭馬空愧陶公頂上巾
留得清風滿衣袖為君吹盡鬢邊塵

覽鄰幾重遊西池兼簡和叔

積雨遶連騎新波灩廣池喜聞重到客更作復游詩逐
水無留絮飄空有斷絲送春吾得地一問故人期

和叔嘗云

西池已罷送
春無地矣

奉同鄴幾對

時律迎陽近天雲帶雪低欲飛含氣象忽散失端倪絳
闕明先曙清衢凍不泥休祥占歲序佳氣動烝黎矯若
翔鷹鷂紛疑剝楚圭晨昏簷影眩壬丙辨方迷賀瑞彤
墀集凌寒玉仗齊御筵開省戶賜醴走宮奚屋角懸珠

網林梢挂素霓山號悲虎兕淵伏怯龜螭哀響求羣鴈
喧啾得食雞飢鷹無近擊狂兔有新封感往悲時物懷
幽夢故棲溫爐期夜擁傑閣想晨躋驗古聞牛目投閒
讀馬蹄吾交情不薄今日手同攜酒撥新醅酌詩看本
字題優游無不可何必剡中溪

照鄰從予假韋蘇州集因以詩致之

都官卽署老平淡古人如更覓蘇州集長依釋子廬室
中無淨几門外自華輿為問蕭疎意如何善福居

送高寺丞宰岐上

墨綬垂腰底憐君尚一同人豪固秦俗地古自豳風春
色鳴絃外山光隱几中定應傳善政不日到關東

城西二首

繡鞅金羈十里塵共傳恩詔樂芳辰千重翠木開玓圀
百尺朱樓壓寶津御柳初長遮雉宮花未識駭遊人
自憐窮僻看山眼來對天池禁籞春

西城馳道直如絃百頃晴波御柳邊韶樂鏗轟羅帳殿

春旗偃蹇近樓船，曲江未賜唐家燕。
靈沼空思鎬邑篇，幾日金輿下閭闔。
魚龍竒戲出中淵。

答和叔見寄

清霜落堤水，知子戒歸舟。
蹭蹬蛟龍雨，翻飛鴻鵠秋。
文章真自樂，得喪豈吾憂。
南國江山好，裁詩寄少游。

和永叔雪

浴鳳池邊雪，舞風題詩高。
楫杜陵翁懷人共惜車音斷，
對酒須論盞底空。
授簡久虛梁苑候，引舟誰過剡溪中。

闕

千載風流未覺窮

南陽集卷八

欽定四庫全書

南陽集卷九

宋 韓維 撰

律詩

同象之方叔過淨因璉上人

二十年來野逸身，懶能奔走傍埃塵。
偶逢閭里閒游伴，同過叢林燕坐人。
世事糾紛寧有盡，勞生蕭散不妨頻。
晴陽緩轡殊多適，它日重來訪道真。

之雍丘舟中奉寄少述處士明叔公綰

柔櫓咿啞畫鷁東
脩然清興不知窮
新秋草樹輕涼外
落日帆檣遠思中
人事感心懷素友
年華催鬢作衰翁
江湖舊約今仍負
腸斷從南萬里風

和三兄立冬祠太乙二首

樓外闌班曉斗垂
霜晴宮瓦濕琉璃
珠幢羽節嚴仙仗
桂酒椒漿潔祠儀
寒氣導迎通律管
神光飛動屬壇壝
定聞賈傳開良對
天子齋居待受釐

曾為祝史趨真館屈指於今二十年琪樹瑤林成想像
直疑當日夢遊仙

送劉景元觀察守襄陽

荊州太守駕朱轡寶筆題詩出御前應厭笙歌消暇日
欲將才業效當年千章翠木雲間寺百丈清江雪後船
看取古來良吏迹蒼碑突兀峴山巔

奉和仲通秋宴

參差天仗拂雲臺雉尾分行劔佩來萬壽稱觴臣節罄

九韶張樂帝顏開班趨玉佩花相鬪舞入文茵雪屢回
踈賤恭承湛露賜慙無辭藻詠康哉

又和史院晚出

新雨稍添清禁潤斜陽初下直廬明方慙飽食無裨補

更作長廊百步行

養生書有飯後行百步

奉和運判朝散登樂山亭

看山日日上孤城不問雲昏與雪晴六六高峯長秀色
雙雙啼鳥忽春聲心驚流水光陰逝身慕冥鴻羽異輕

方促吏文嚴指使不知詩興坐中生

運判再以前韻見寄

突兀朱堂冠北城雲峯滿目互陰晴憑欄不負思山意
對酒何煩考鼓聲清話從容雙塵禿雕章溫麗百金輕
歸軒未必能相遲夢遶西湖春水生

湖上飲

高秋水木變清光荷葉乾枯穉稭黃習靜久安融子懶
乘桴聊發次公狂未甘濁酒欺人老深喜寒花入坐香

更謝林端新月色留連歸舫盡三觴

載酒過景仁東園

地勝依危堞城高若半峯
銜觴驚歲序候雪仰雲容不

假猫滋竹

新植竹皆茂世傳猫壅之竹下則根為滋長

須防犬敗松

新松十餘株皆

枝葉折云犬所踐嚼

顧慙文俗吏游步躡仙蹤

和張太中館於西湖

湖榭從來與衆同况於清晏奉羣公
驅車即日趨翔鳳就館初寒聽過鴻
霜雪滿髯仍自壯珠璣落筆不知窮

太平魚鼈今咸若豈繫區區一老翁

和樂道

紅旆重來鎮故鄉吏民懽喜拂牙床忽頒優渥垂天詔

仍許衰殘守郡章自笑木雞猶獨立

某不能引避樂道深所愧恨

人

嗟竹馬漫相將

樂道改穎川吏民之望

君皇念舊恩非淺南北圭

符各一方

和伯壽秘監

曾陪道論接清歡屈指於今四十年不用笙歌娛上客

直將風月待高眠
黃花一醉猶能否
白首相逢是偶然
便欲投冠結閒伴
家山況與碧嵩連

和曾令綽

卧病河橋與死濱
還家重喜見芳春
輔藩行釋綬安重
仁里欣聞締構新
危堞遍臨雙遠岫
平湖不受一微塵
知君雅有超然興
香火它年作社人

和子華兄喜雨

膏潤涵濡萬物中
欣然生意滿和風
撒飄先動吟毫紫

急酒疑催舞袂紅
病手便甘十日醉
疲農又得一年豐
去年已稔歡聲定有歌堯壤
喜氣遙瞻遶漢宮

奉同景仁九日宴相公新堂

高堂突兀里人驚
丞相規模固自宏
移石遠分嵩嶠色
鑿池切放潁泉聲
茱萸結佩聊同俗
鸚鵡傳杯豈吝情
右席先生亦華構
便應次第落新成

對雪送花走筆況之

春陰黯黯壓城低
亂撲簾帷細點衣
梅蘂更寒猶競發

楊花未暖忽先飛便思樽酒陪公議

非議公事
法不會食

敢望笙

歌近使威絕景坐嗟清燕隔一簾朱白慰旋歸

答趙縣丞

止足常佳漢二臣

二

早思幽退謝朝紳奉藩終乏三年

最學道才知一日真目病懶將書卷展心閒得近酒杯
頻朝吟夕嘯無厭數正賴賢賓與德鄰

題卞大夫翠陰亭

新得亭名號翠陰軒窓環合盡青林定知野客先回顧

何處山禽自好音池面有蓮風氣馥城根多竹月華深
明年便作歸來計應許携樽與抱琴

通判郎中以州早休特形詩詠輒依元韻

潁水箕山一腐儒麟符何幸玷恩除未緣批政休官去
真賴英賢接迹居秀麥川原知雨足清陰池館愛春餘
坐慙老拙無施用空下齋帷學仲舒

依韻答欽之學士草堂見寄

白首徘徊玷善藩慙君先解左魚還未同一笑清樽側

獨想高眠翠竹間素節消餘寧復壯妄情休盡只餘閒
田園雨足官無事趣駕何妨慰病顏

伏蒙三哥以某再領許昌賦詩為寄謹依嚴韻
久陪法從常懷愧再領鄉州始覺榮政事敢言前可繼
寵光深見古為輕預裝白酒留春盞旋剪紅葩出洛城
兩道況聞時澤足不妨吟嘯玉盃傾

化光殿丞謁告還里某數奉游集蒙賦詩道舊
輒依元韻

定契多慙國士知交懽重喜故人期莫辭日嚼千觴酒
況值春歸百卉枝披竹共尋前會處插花仍學少年時
詞章褒紀明情重坐諷行吟刻屢移

和君俞喜雨

一夜歊炎散烈風清和從令氣潛通誠微敢謂天心應
政拙惟希歲事豐便有懽聲南畝俗首傳佳句少陵翁
心灰鬢雪無餘願飽食安居與衆同

奉答樂道

禁職臺綱佚舊儒青林華屋儼高居炎天久隔揮犀論
暇日聊脂載酒車雨逼秋容生戶牖風回涼思入襟裾
東朝第一推調護聖主寧容久卧廬

和君俞偶成

竊比淮陽卧幸非莊舄吟政餘無異事物外得同心遇
興傾浮蟻投閒作戲禽世間并出世於我兩沉沉

和太素同省梅花寄子華

寒林凍卉誰觀者繁艷清香自得之天賦好花如有待

日尋幽徑不知疲未逢驛使空懷遠猶喜山翁亦好奇
昔歲一觴今一咏共陶真意不為私

奉和樂道席上見詒

大隗山前一老翁幸分州契接羣公飲豪肯放兵先北
論合須欣水必東坐對華燈燃寶檠行看紅艷發珍叢
良辰勝事從茲始嘉與吾民樂歲豐

奉酬君俞席上偶成

候月紗籠合看梅翠幄開滿城均俗樂同閑得君來笑

極時傾弁歡狂欲倒壘賦詩慙善祝凡器豈公台

觀燈市井之利得雨農田所急而二者不可以
並時乃所願燈徹而雨作也今幸得之輒次原
韻以酬來貺

風回協氣通青律月破游氛上碧天萬盞華燈輝永夜
一犁甘雨報豐年梅含宿潤粧先試蕙展新柔手不拳
雲勢崇朝殊未已坐看澤徧先垓田

再和樂道

鳳凰臺下芳林合鴨子陂中綠水深不惜清光輸曲沼
欲將幽韻伴鳴琴餘波及晉良慙昔春服公沂正在今
洗耳濯纓何足道願同沉醉復高吟

奉酬君俞

夫君有奇尚與世實相差不飲三春酒

入春不復飲

唯看九

日花

唯愛菊花

名雖賢士籍心自法王家顧我何能爾東風

醉弁斜

和君俞春莫書事

舉俗從多事惟君獨閉關廢觴豈為戒開卷不妨閒小
雨清湖面飛花亂席間應憐狂太守心不到靈山

次韻奉答四哥廷評欲垂訪以詩為示

王四

再臨鄉國兩逢春乞與優閒荷帝宸德薄敢同商四老
論狂難預漢諸臣行吟水際花粘履燕坐林間絮點茵
早晚湖波照車馬為君酌酒鱸鮮鱗

次韻奉答君俞

閭里幽居几案前跡雖相異意同然禪書罷閱成端坐

訟牒希投得晏眠情累已知超永劫身名那復計當年
才疎政拙逢嘉歲敢竊天功自謂賢

樂道示長句輒次韻

光陰不覺成陳迹事變何嘗有定期身外閒愁無自入
飲中歡興未全衰編排暑後新投酒檢點秋來合唱辭
更欲邀君浮畫舫藕花菱蔓滿西池

次韻君俞偶成

我道非生滅天時自去來交親常在席醪酒不空罍默

坐唯聽水間行忽見梅何人同此適君意亦悠哉
雪意凝還解冰紋結復開林鴉時嘯侶城雉不憂媒造
適心無礙忘機語絕猜曹溪不欺我何處有塵埃

奉和君俞佳雪二首

老來事事皆拋盡惟獨憂民尚有心深喜天公回氣象
便同田父作謳吟緣何更得閭閻暖恨不偏於壠麥深
禪伯靜中知我意琅琅佳句玉其音

居塵不染先生意與衆同憂太守心兩處本來非異事

一時都把付高吟忽驚瑞相家家徧潛助春功日日深
擁鼻臨池哦麗句水泉風竹共清音

酬盈祖中散

勇脫塵冠尚壯年高齋圖史日蕭然不教歌舞家規在
先公不高家妓盈祖亦然善作文章世學傳道舊每思傾濁酒仰高
徒覺愧華顛相君昔展西陂盡好約春風放畫船

和詹叔遊廬山見寄

香爐峯色壓羣山仰眺頻歌使者冠江面烟波搖紫翠

佛宮金碧照晴寒，密藏幽谷梅千樹。散走鳴泉竹萬竿。
今日頓驚塵慮盡，一章佳句雪中看。

東禪院坐上作

山林曾是自由身，豈合區區入世塵。蕭散未能忘故態，
優游聊喜及時春。閒中濁酒偏親我，風外飛花欲趁人。
多謝鳴鳩催對雨，坐慙無術粒斯民。

次韻和李公達見寄

五分符竹盡吾鄉，聖主恩私溢故常。攬轡豈能清北道，

京西支節時得問西堂

毗盧長老

湖邊凍柳生春意月下晴

梅動暗香乘興可能同一醉聞君筋力尚堅強

答張念七得科見寄

少年初見一經橫籍籍文場藹俊名抗志直思追二祖

君家再世第一人登科

得官今乃後諸生賜袍便欲欺芳草賀酒

猶能及落英我亦林泉有歸興待君吟嘯樂昇平

和朱主簿遊園

白首昏昏度歲年忽聞春至便開顏溪頭凍水晴初漲

竹下名園晝不關，旋得歌辭教妓唱。
遠尋梅艷喚人攀，如今尚有官拘束。
解組歸來始是閒。

和微之燕西湖

三月韶華大半過，好花零謝已無多。
暮年光景如殘夢，浮世塵勞付浩歌。
游子有時眠岸草，啼禽終日在庭柯。
白頭不作垂鈎客，辜負春湖十里波。

和微之喜雪

凍雨吹花六出成，高樓一見瓦闌干。

闌

已驚密勢昏羣岫

更想餘霖及列城照水

闕

生秀氣跳枝喜鵲弄和聲

曾陪舞蹈豐年

闕

擁溫貂夢帝京

和微之

庭訟蕭然畫景清每因閒暇接耆英言詩屢奉從容論
對酒常懷淡泊情解扶尚思嵩嶠色入朝還聽禁鐘聲
憐君壯歲多留滯不盡鵬搏九萬程

登湖光亭

雪盡塵消徑露沙公家池館似山家翠痕滿地初生草

紅氣通林未放花
西岸平波清照鴈
壓城危榭斗回鴉
自慙白首猶圭組
此地年年賞物華

千葉梅

南園卉木徧春光
獨愛瓊葩掩衆芳
不為雪摧綠正色
忽隨風至是真香
未經採折攜樽酒
忍見飄零入野塘
醉客為予簪白髮
欄邊幾平作少年狂

曹通直以顏魯公墨蹟題辭乞詩刊石

臨池餘事得忠臣
白刃林中不動身
見義捨生安為已

懷諼保位獨何人英名在世長如日遺像於今凜若神

汝州開元
公遺像在

一覽

闕

誠方自失羞將累句刻蒼珉

答張念五見寄

林泉蕭洒逸平生不識人間寵辱驚美質自全荆璞貴
嘉名長共洛波清身雖貧約非原病詩為窮愁似孟精

命駕高蹤久無繼一時風義獨歸程

近者正叔侍講惠
然見訪聞之謂無

愧多

閒房書事示五弟及諸姪等獻肅公

老病歸休得桶樓吾廬蕭洒樂天倪北窓偃卧都何有
東閣過從亦自揆碧檜輕烟無鳥哢庭檜終日無
一禽鳥棲止綠槐
風細或蟬嘶世間萬事全如夢豈得南華物我齊

次韻

勢利拘牽無已時超然真樂絕端倪家風淡寂從今見
人事塵勞與我睽門外旌旗猶望拂轅間欵段已鳴嘶
何當解組如初約直與西京二傳齊

和景仁之什

美疾隨冰釋微陽應律生嚴風散餘燠密雪暗深更預
喜銜盃集當期策杖行知公有新慶金奏動皇情

桃花菊

誰測天工造化情巧將紅粉傳金英武陵溪上分佳色
陶令籬邊得異名不使秋光全冷淡却教陽艷再鮮明
瓮頭消息香醪熟何必黃花便可傾

又

霜女星娥不俗情施朱點出淺深更平泉記上遺嘉品

本草經中注別名氣得清凉開更早色霑寒露久逾明
今朝樽酒來籬下不為重陽為爾傾

次韻奉同景仁答微之

鵝腹靈砂養就丹知公不復更衰殘洛川花下經春醉
湫水亭邊盡日歡白髮高吟思老筆青娥嘉贈竚華鞍
淮陽過客如相問莫道閒人姓范韓

覽景仁君實議樂以詩戲呈景仁

少年議樂至顛華作得文章載滿車律合鳳鳴猶是末

尺非天降豈無差勞心未免為詩刺聚訟須防似禮家
一曲銀簧一盃酒且於閒處避風沙

奉和樂道

昔聞有客薦揚雄清世文章又見公奏賦獨高天下士
辭榮遠繼古人風懷賢不啻三秋久置酒須期十日中
幸有紅芳粧點在可無多愧白頭翁

和景仁湖中

繁花亂委茵鋪錦弱柳交垂綠作籠竹影入波添舊翠

橋陰橫岸見新紅

新作西橋

臨觴善謔如平日落筆佳章有

古風早乏斯文華國體更將何術代天工

答景仁斷章之句


去冬蒙君實示嘉篇懶拙不即修謝臨書走筆

深愧浼瀆

南園百草雨中秋把燭題詩寄驛郵意重不辭終日看
韻強深愧隔年酬登山屢赴幽人約築野猶稽聖主求
命駕幸無千里遠春湖艤楫待君遊

寄題曹大夫棲真堂

聞君初欲挂冠纓便構茲堂不日成桐檜茂陰歸後得
烟霞高興坐中生禪心皎月通宵靜詩思寒泉徹底清
十五年來飽閒散紛紛人世自浮榮



南陽集卷九